

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ١٥ إبريل ١٩٦٨

الحاضرون

فائق.. للإرشاد القومى، كمال هنرى أبادير..
للمواصلات، فريق أول محمد فوزى.. للحرية،
محمد حلمى مراد.. للتربية والتعليم، محمد عبد
الله مرزبان.. للتموين والتجارة الداخلية، إبراهيم
زكى قناوى.. للرى، على زين العابدين صالح..
لنقل، أحمد مصطفى أحمد.. للبحث العلمى،
السيد جاب الله السيد.. للتخطيط، حسن حسن
مصطفى.. للإسكان والمرافق، محمد بكر أحمد..
لاستصلاح الأراضى، عبد العزيز محمد
حجازى.. للخزانة، محمد حافظ غانم.. للسياحة،
محمد صفى الدين أبو العز.. للشباب، ضياء
الدين داوود.. للشئون الاجتماعية وللدولة
لشئون مجلس الأمة، عبد العزيز كامل.. نائب
وزير الأوقاف.

الرئيس جمال عبد الناصر، حسين الشافعى..
نائب الرئيس ووزير الأوقاف، صدقى
سليمان.. نائب الرئيس ووزير الكهرباء والسد
العالى، الدكتور محمود فوزى.. مساعد رئيس
الجمهورية للشئون الخارجية، كمال رفعت..
للعمل، عزيز صدقى.. للصناعة والبتترول
والثروة المعدنية، عبد المحسن أبو النور..
للإدارة المحلية، ثروت عكاشة.. للثقافة، محمد
أبو نصير.. للعدل، سيد مرعى.. للزراعة
والإصلاح الزراعى، حسن عباس زكى..
للاقتصاد والتجارة الخارجية، محمد النبوى
المهندس.. للصحة، عبد الوهاب البشرى..
للانتاج الحربى، محمد لبيب شقير.. للتعليم
العالى، محمود رياض.. للخارجية، شعراوى
جمعة.. للداخلية، أمين هويدى.. للدولة، محمد

المحتويات

الصفحة

الموضوع

- ١- عبد الناصر يفتح الحوار حول تشكيل اللجنة المركزية،
والعناصر التى تدخل المؤتمر القومى، والانتخابات
١
- ٢- سوء الوضع فى القضاء
٦٥، ٥١، ٤٠-٣٨، ٧
- ٣- عبد الناصر.. عن الثورة المضادة وضرورة اتخاذ إجراءات
شديدة فى مواجهتها لعزلها
٤٦، ٤٤، ٣٣
- عن أحداث ١٩٥٤
٤٧-٤٦، ٣٥

سرى للغاية

الصفحة	الموضوع
٣٠	المحكمة الدستورية العليا تم اضافتها فى بيان
٤١	مارس
٤٣	تعريف العامل والفلاح
٤٦	العمليات المضادة فى القوات المسلحة، والموقف منها
٤ -	محمود رياض.. التطورات الأخيرة بالنسبة لاسرائيل ومهمة يارنج
٧٤	فى الأردن وموقف الأمريكان
٧٧	تفاصيل رسالة الأمريكان لفيصل وموقف الملك حسين
٧٩	ما المتوقع بالنسبة ليارنج؟
٨٢	عبد الناصر.. قفل القناة للضغط على مصر
٩٢-٨٣	٥- القوى العاملة ومشاكل تعيين الخريجين

سرى للغاية

قرارات مجلس الوزراء

فى ١٥/٤/١٩٦٨

مناقشة عدد من المسائل الداخلية، من بينها التقارير التى قدمها الوزراء عن الاجتماعات التى شاركوا فيها لمناقشة بيان ٣٠ مارس، وما أبدته الجماهير من استفسارات.

مناقشة التقرير المبدئى الذى وضع عن الميزانية الجديدة.

سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ١٥ إبريل ١٩٦٨

عبد الناصر: راجع شباب يا سيد.. خاسس يعنى.

مرعى: الحمد لله يافندم.

عبد الناصر: أنا كنت عايز نبتدى الكلام بإعادة بحث الموضوع اللي اتكلمنا فيه الجلسة اللي فاتت بخصوص الوزراء والانتخابات.

الحقيقه الملاحظات اللي جاتلى والجوابات اللي جاتلى أكثرها منصب على اللجنة أولاً، وإزاي التعيين؟ والتعيين هيبقى هو مراكز القوى؟ معرفش يمكن شفتم هذا الكلام. جوابات كثيرة جدا على موضوع اللجنة، لدرجة إن أنا طلبت يعنى من هيكل إنه يفسر ما هو موضوع اللجنة؛ ده الواحد جاب اللجنة علشان مايقولوش إن بتوع الاتحاد الاشتراكى هم اللي هيقولوا إن الاتحاد الاشتراكى هو اللي مرتب العملية! فأنا فكرت فى اللجنة على أساس نقفل سكك.

والبيان هو إيه أصلاً؟ عبارة عن لم كلام انتقال من أول النكسه لغاية دلوقتى ووضع فى صيغة.. يعنى إحنا ما عملناش حاجة جديدة! فدلوقتى اللجنة بالذات إذا كانت هى اللي هتشرف على الانتخابات من باب أولى إنها تدخل المؤتمر لأن هى اللي هتشرف.

أنا حتى فى تقديرى بعد الكلام ده نقلل عدد اللجنة، أنا كنت بقول:

٥٠ نعمله ٢٠.

الحقيقه وأنا هتكلم على الوضع الداخلى بعد النقطة دى. فأنا ميل الى إعادة بحث الموضوع بتاع الوزراء مرة أخرى، وأنا دلوقتى فكرت أنا

سرى للغاية

هاطلع قرار بتعيين أعضاء مجلس الوزراء كلهم فى المؤتمر، بيتهيالى هيبقى ده ISSUE كبير جدا بالنسبة لما لاحظته فى العملية اللي فاتت. ولهذا أنا رأى إن التعيين هيصر، واللى يقدر يدخل الانتخابات يدخل واللى شايف إنه مفيش داعى يدخل الانتخابات مايدخلش. دى عملية مش ضرورى يعنى الوزير بيكون عضو فى المؤتمر أو يكون عضو فى اللجنة المركزية وإلا يعنى الصورة تختلف، معرفش رأيكم إيه؟ أحب أسمع.

أبو النور: فى كل الاجتماعات اللي احنا حضرناها فعلا النقطة اللي سيادتكم أثرتها دى أثيرت، والناس عايزة تعرف ما ورائها؟ لأنهم فاهمين أولا: بالنسبة للجنة إن هتيجى عناصر مسؤولة أو إن دى طريقة بموجبها أنها تدخل المؤتمر ثم بموجبها أنها تاخذ اللجنة المركزية وما بعد هذا! هم مش عايزين هذه الناحية على هذا الأساس، على أساس زى ما سيادتكم قلت مفيش مراكز قوى وعلى هذا الأساس يخشوا، إن المגיע بهذه الطريقة يكون فيه مراكز قوى جت بهذه الطريقة. ولذلك لما سيادتكم توضح هذا الموضوع ويدخل فيه هذه العناصر التي ليست من العناصر المسؤولة، يمكن تحل هذا المشكل اللي هم خايفين منه، وطبعا تقليل العدد دون شك هيبقى بالنسبة للعدد الكبير بتاع المؤتمر مالوش تأثير.

بالنسبة للوزراء، فى اعتقادى أفيد كثيرا إن اللي يرى فى نفسه إنه يقدر يدخل عن طريق الانتخابات يبقى أحسن.

سليمان: يهمنى أكثر إنى أتكلم بصراحة فيما يختص بموضوع الانتخاب، أنا مشفق جدا من تجربة الانتخاب، إحنا سبق إننا جربناها. لا شك إن الاتحاد الاشتراكى فيه عناصر قاندة وعناصر رائدة قامت بحمل العبء طول الفترة

سرى للغاية

اللى فاتت ومصلحة كبيرة إنها تبقى، العناصر اللي ثبتت إنها غير ناجحة ممكن إنها تمشى.

فلما نيجى نقول إن المؤتمر مكون من ١٤٠٠ واحد منهم ٥٠ واحد بالتعيين، مآظنش يعنى إن فيه أى منصف يخش فى جدل هل الـ ٥٠ دول إيه لازمتهم؟ مهما عملنا مش هنرضى أبدا رغبات الناس، إنما اللي باخشاه أنا إن أبص ألاقى الـ ١٤٠٠ أو ١٥٠٠ مانعرفش نكون منهم اللجنة المركزية ولا اللجنة التنفيذية العليا.. ده احتمال برضه علينا اننا نعمل حسابيه.
ده رأيى.

مراد: أنا أتفق مع اللي قاله السيد صدقى سليمان، لأن من غير المعقول إن الـ ٥٠ اللي هم هيتولوا الإشراف على عملية الانتخاب وهيراعوها من كافة النواحي بأسلوب الحيادية التامة، من غير المعقول إن نفس هؤلاء نطبق عليهم صورة من صور العزل السياسى.

عبد الناصر: لا.. ده تقرر فى البيان اللي هتعمله اللجنة، حسب البيان اتقال إنها هتدخل المؤتمر.. ده موضوع.

مراد: أثير برضه حول ضم هذه اللجنة الى المؤتمر.

عبد الناصر: قال له فسر.. ممكن أنا فى كلامى أبقى أفسر.

مراد: أصل أنا كنت متصور إن الوزراء هيبقوا جزء من هذه اللجنة.

سرى للغاية

عبد الناصر: ممكن، الموضوع أصلا مرن جدا بس هو إيه يعنى ماقدرش آجى آخذ الوزراء كلهم وأدخلهم! إحنا كام عددا ٣٠ واللجنة التنفيذية العليا فيها بره فيها أنور السادات وعلى صبرى آدى ٣٢، وأنا بقول اللجنة يعنى ٢٠ أنا فكرت إن أنا أقلل عدد اللجنة. هو المبدأ اللى أنا بقول فيه اللى هو بالنسبة للوزراء، ده الكلام اللى أنا بقول فيه وأحب أسمع منكم يعنى.

المهندس: هو الحقيقة فى موضوع الـ ٥٠ أنا هتكلم الأول عن اللجنة اللى هتضم للمؤتمر، كنا النهارده فى السويس أنا والأخ وزير الشباب عملنا ندوتين مع العاملين هناك، وبعدين وجدنا أن منطقة القناة لظروفها مش عاوزة عملية الانتخابات على أساس إن فيه ناس مهجرين، وكانوا بيتكلموا إن الانتخابات بالنسبة لهم لظروفهم! وإذا كنا بنقول: إذا كنا ناخذ عدد من مدن القناة للجنة ويشرفوا على الانتخابات ويضموا للجنة، ونجنب المنطقة دى فى الظروف دى الانتخابات على أساس إن ظروفهم هناك وفيه..

عبد الناصر: ده خارج عن الموضوع كلية، الموضوع اللى بنتكلم فيه يا دكتور أنا حتى كنت عايز أقلل عدد اللجنة علشان ألقى ٢٠ واحد محدش يلقى حاجة فيهم.. محدش يلقى حاجة تجرح؛ لأن هى مشكلة التعيين مشكلة برضه، هيمسكوهم يشرحوهم، عايزين ناس مايلاقوش فيهم حاجة يشرحوهم فيها. وهو أنا لما هتكلم عن الأوضاع الداخلية كما أتصورها وأديك صورة للأوضاع الداخلية كلها، وأنا بقالى ١٦ سنة يعنى متتبع ماذا يحدث فى البلد بالتفصيل - مش بس يعنى بالعموميات لأ بالتفصيل - هنقدر نشوف إيه الوضع، هنناقش برضه الوضع العام.

سرى للغاية

شقيير:

يافندم بالنسبة للجنة، أنا فى اعتقادى إن السادة الوزراء مايقوش فيها؛ لأن ممكن من الأسباب اللي فى ذهن النقاد اللي بيوجه للجنة إنهم متصورين أنها - لو إنهم مايقولوش هذا الكلام إنما فى الخلفية بتاع تفكيرهم - إنهم متصورين أن اللجنة كـ ٥٠ معمولة لكى تشمل جميع الوزراء وعدد آخر يضاف اليهم لتبرير دخول الوزراء.. دى نقطة أولى.

ولذلك يحسن فى اعتقادى أن اللجنة ميكونش فيها حد من الوزراء. الناحية الثانية يافندم: بالنسبة للعدد بتاع اللجنة، حتى لو بقى ٥٠ يكون أحسن لكى نستطيع نمثل كل الفئات فى هذه اللجنة.. يعنى لو بقت ٢٠ يمكن تجد سيادتك صعوبة فى إن جميع الفئات تمثل إلا تمثيل ضعيف، إنما لو بقى ٥٠ بيكون فيه فرصة فى الواقع لتمثيل كل الأطياف.

الناحية الثالثة: فى كل المؤتمرات اللي بنعدها الصيغة اللي تقال: بيجوا رجال قضاء يعملوا اللجنة.. ده كلام بيتقال وبيتردد فى كل حنة. بسأل برضه.. هل مايمكنش نضع من السياسيين فى القضاء ناس مش كل اللجنة إنما عدد له برضه قيمته داخل اللجنة؟ بحيث إن الفكرة اللي الناس بتقولها دى تجد لها استجابة معينة.

بالنسبة لنزول السادة الوزراء الانتخابات، أنا شايفها ضرورى لسببين يافندم..

السبب الأول: مفيش فى الواقع وزير مبيقاش مش مستند على عملية الانتخابات.

السبب الثانى: بالنسبة للمؤتمر بشكل عام، ممكن الوزير يبقى ويخرج حسب الظروف، وقد يكون عنصر مهم لينا وللثورة إذا خرج الوزير من الوزارة من المصلحة أن يبقى فى المؤتمر من خلال عملية الانتخاب، إنما لو ضم كوزير هيكون بقاؤه مش ميسر يعنى.

سرى للغاية

رياض: عمل اللجنة إيه؟ يعنى ٥٠ أو ٢٠ هل هو مجرد عمل إدارى بحت؟

عبد الناصر: إنت فاكرنى يارنج جاى تقول لى عمل اللجنة! (ضحك)

أصوات: (ضحك)

عبد الناصر: أصل أنا بقرا محادثاته مع يارنج، كل ما يقول له حاجة يقول له: أنا بدى أفهم قصدك إيه! (ضحك)

أصوات: (ضحك)

رياض: (ضحك) أنا عايز أفهم يعنى.

عبد الناصر: هقول لك طريقة تفكيرى: أنا حاطط مواضيع ومن فيها جدا، وحاطط مواضيع علشان أقفل فيها سكك أعدائنا. ليه حطيت اللجنة؟ الناس بتقول: على صبرى هو اللى هيعمل الانتخابات، وهيهاجموا الاتحاد الاشتراكى الجديد قبل حتى ما بيتدى ويتقال، والغرض الحقيقة هو مهاجمة صيغة تحالف قوى الشعب العاملة.. بتكلم بمنتهى الصراحة.

أنا عارف اللى بيتقال فى البلد إيه وعارف كل حاجة، علشان أقفل كل هذه الصيغ أنا هاروح أقعد فى الاتحاد الاشتراكى وهقول لهم: رَوِّحوا وجيب معايا لجنة تقعد تعمل انتخابات.

رياض: يعنى عملها إدارى، ده اللى أنا بسأل فيه يافندم.

سرى للغاية

عبد الناصر: لا.. يعنى عملها هاتحل محل الأمانة العامة للاتحاد الاشتراكى الموجود دلوقتى.

رياض: هيكون عملها إدارى، أنا بسأل السؤال ده ليه؟ لأن الكلام اللى قاله الدكتور لبيب بالنسبة للقضاء هو عمل إدارى بحت.

عبد الناصر: لا.. لا.. لا.. هذا الكلام لى رد عليه.. الكلام بتاع الدكتور لبيب الخاص بالقضاء، يعنى القضاء نفسه موضوع يعنى ليه الناس النهارده بتقول: القضاء؟ ليه ماشية نغمة القضاء؟ القضاء بالذات موضوع هاكلمكم فيه. فى موضوع القضاء، فيه ناس النهارده بيدفعونا لليبرالية الكاملة فيقول لك: عايزين عنصر قضائى.. عايزين عنصر قضائى.. عايزين عنصر قضائى! وهو بالنسبة للشعب الناس اللى مش لاقية حاجة تسمعها بتسمع أى كلمة، وهيقول لك إيه؟ هيقول لك الكلمة اللى سامعها.

لكن الوضع النهارده فى القضاء - وهاكلمكم فيه - الوضع مايسرش.. وضع وحش ليه؟ لأن فيه اللى طبقت عليه القرارات الاشتراكية موجود! إحنا ماشلناش حد من القضاء من أول الثورة أبدا، ولم نتدخل فى القضاء مطلقا، وليه إحنا قلنا الحقيقة، ليه اتقال عدم الطعن، وعدم الكذا ونعمل محكمة كذا، ونسوى محكمة كذا وينودى محكمة عسكرية ونعمل؟ لأن الحقيقة مكانش فيه ثقة، يعنى هو ده الوضع اللى كان موجود.

وبعدين برز فى الفترة اللى فاتت - وهتكلم برضه عليها - إيه اللى موجود فى القضاء واللعب اللى موجود فى القضاء. فعملية القضاء دى هى عملية الغرض منها الحقيقة تسليم بقى الثورة كلها لعنصر هو مش تقدمى، بل بالعكس فيه الرجعية أغلب - مع احترامى للسيد أبو نصير -

سرى للغاية

والناس اللى طبقت عليهم القرارات كلهم موجودين واحنا ماعيناش فى القضاء فيه الرجعية أغلب.

أنا مش أنا بقالى ١٦ سنة؟ لم أعين واحد فى القضاء. ولو طبعا كنت عايز أعين كنت أعين؛ لأن كان بيجى النحاس باشا كان بيعين، وكان بيجوا.. سيد، حكومتكم بتعين ولاّ لأ؟ على طول ويدخلوهم فى القضاء، وهم دول النهارده اللى موجودين بتوع الدستوريين والسعديين والوفديين هم اللى موجودين فى القضاء اللى عينهم إبراهيم عبد الهادى والنحاس باشا وغيرهم موجودين، واحنا لم نتدخل فى هذه النقطة. وإذا كنت أسلم دول البلد فأحسن أسلمها للأصل بتاعها للحزبيين القدامى!

شقير: أنا مقصدش يافندم إن اللجنة تبقى قضائية.

عبد الناصر: أنا فاهم.. أنا باشرح.

شقير: أنا بقول: فيه عنصر قضائى سياسى، فيه شبان يكونوا كويسين مش كل اللجنة تبقى قضاء ولكن تكون مطعمة ببعض العناصر.

عبد الناصر: أنا بأشرح ليه الكلام على حكاية القضاء.. ليه مشى؟ إتقال العنصر القضائى. يقف واحد من الدكاترة عندك فى كلية طب من ٣ أيام، وقال: إن هو عايز عنصر قضائى! تفكر مين هو؟ دكتور ويكسب فى الشهر كام؟ ١٥٠٠ جنيه فى الشهر.. دخله فى الشهر ١٥٠٠ جنيه! ويقولوا كلام، وإزاي منعنا مجلس القضاء الأعلى من نشره فى الصحف وكلام فاضى، ولكن العملية طبقية كلية.

سرى للغاية

ويعدين لما مسكت أسامى ال ٢٠٠ واحد اللى اجتمعوا، كان بيكسب ٣٠٠٠ أو ٢٠٠٠ أو ١٥٠٠ جنيه فى الشهر. بالعكس والله كمال حسين كان طالب إنهم مايقوش فى هيئه التدريس وأنا رفضت هذا الكلام؛ لأن هو كان رأيه إن هيئه التدريس تبقى تفرغ واللى عايز يجى من بره يبقى زائد. وأنا قلت له: دى ناحية علمية ودول ناس شطار وكذا، ولم نطبق هذا الكلام. فمين اللى عمل الاجتماع؟ سرور بيكسب كام اللى إنت عينته عميد.. سرور بيكسب كام؟ عميد الكلية بيكسب كام؟

بيكسبوا كتير! شقير:

عبد الناصر: هى عمليات الحقيقة الغرض منها انتهاز الفرص لضرب الاشتراكية الحقيقة.

الشافعى: الحقيقة إذا أخذ بالكلام اللى بيقال من غير تنقيته، ممكن فعلا إن هو

يودينا الى درجة بعيدة خالص عن المطلوب.

وزى سيادة الرئيس ما قال بالنسبة للبيان: إن الرئيس واضح، فيه

مجال للمرونة بحيث إنه هيقدر يواجه جميع المواقف وجميع الاعتبارات.

يمكن الواحد يحب يرجع برضه لمرحلة الانتخابات اللى فاتت،

والاتحاد الاشتراكى مكانش له لسه أى تكوين، اضطرينا فى هذه المرحلة

إن احنا نستعين بموظفين فى هذه العملية، على إن ملناش قاعدة ملناش

أساس نقدر نستند اليه.

وما من شك أن التركيز برضه بالنسبة للاتحاد الاشتراكى فى

المرحلة اللى فاتت برضه أوجد حساسية، جايز تكون زايدة عن الحد بعض

الشيء، ولكن فى نفس الوقت هو اعتبار إن زى لما بيحبوا وزارة مستقلة

سرى للغاية

هى تقييم الانتخابات، وبعد الانتخابات ما تتم بتجى القوة الحقيقية اللى هى بتعبر عنها الانتخابات.

بيتهياىلى لو العدد يكون قليل ما أمكن، على أساس إن هو يقوم بالعملية التنظيمية والعملية الإدارية بحيث إن برضه ميقاش برضه فيه التركيز على هذا العدد الصغير فى انضمامه؛ لأنه مهما كان هو هيقوم بالعملية التنظيمية، وهاعتمد فى تنظيم عملية الانتخابات على جهاز إدارى بس هو اللى هيقوم بالعملية التنظيمية لهذا الموضوع.

اللى أنا عايز أخلص منه، أنه كلما كان العدد أقل كلما كانت العملية أحسن. والواقع إن الاتحاد الاشتراكى فيه قيادات نشطة وقادرة على إنها تتجح فى مواقعها هتقدر تكون فعالة - اللى مش هتقدر الحقيقة مساندها بتبقى عملية بتموت العمل السياسى كلية - بإن بيبقى فيه انتصار. وده بينقلنى لنقطة بالنسبة للمحافظين كعناصر أساسية فى عملية الانتخابات، بيتهياىلى بعض المحافظين لازم نقلهم يتم قبل الانتخابات ما تاخذ مجراها.

عبد الناصر: هو بالنسبة للمحافظين: هو عبد المحسن قدم لى مشروع، ولكن أنا رأى مانبتديش ننفذ إلا بعد ما يقولوا: نعم؛ لأن أنا قايل فى البيان وبرضه أنا اتكلمت الدور اللى فاتت وقلت: نشوف يمكن ننفذ الجمعة دى، وبعدين الحقيقة بعد ما أنا مشيت من هنا الجمعة اللى فاتت روتت قريت البيان تانى. (ضحك) فأنا قايل فى البيان: فإذا كانت الإجابة بنعم هنفذ، طيب أنا هابتدى أنفذ إزاي أنا قبل ما يقولوا نعم! الحقيقة أنا بدى بالنسبة للعمليات كلها اللى اتقال عليها وأى عمليات أخرى بنجهزها، وبعد ما يتقال نعم ننفذ على طول. لكن الدكتور حلمى جرجرنا الجلسة اللى فاتت فى

سرى للغاية

البدء فى تنفيذ البيان قبل الاستفتاء - المشروع اللى كان معاه - وأنا الحقيقة فى كلامه تماشيننا كلنا حتى فى هذا الكلام.

بعد ما رّوحت جبت البيان وقعدت قريته، فالبيان بيقول: فإذا كان الإجابة بنعم هنفذ، بدليل حتى ناس باعتين بيسألونى.. إذا كانت الإجابة بلا هتعمل إيه؟! مقلتلناش! (ضحك) وأظن سنلتوا أنتم وأنا شوفت فى الملاحظات على الندوات اللى إنتو روحتوها.

إحنا النهارده ١٥ إبريل وفاضل على ٢ مايو ١٥ يوم، فالعمليات دى كلها تتعمل بعد الاستفتاء.. عمليات المحافظين مثلا بعد الاستفتاء وقبل بدء الانتخابات؛ لأن عندنا الانتخابات هى مايو ويونيو لغاية ٢٣ يونيو، العملية الأولى تاخذ يوم، ويعنى العمليات كلها ممكن تتعمل عدة أيام.

مراد: فيما يختص باللجنة، أعتقد اللجنة ميدخلهاش السادة الوزراء؛ لأن خشية الناس أنها تكون طريقة لدخول ناس عن طريق التعيين. اللجنة المفروض إنها هاتشرف على إجراء الانتخابات - وزى ما إحنا كنا بنقول فى اجتماعاتنا مع القواعد - إنه أى حزب فى العالم وأى تنظيم سياسى مايجبش القضاء يجروا له فى الانتخابات؛ لأن المفروض إن هذا مش انتخابات لمجلس الأمة يعنى الشعب بأكملة لأ.. دول أعضاء الاتحاد الاشتراكى.

عبد الناصر: هيجوا أظن هيشرفوا هم على الاستفتاء.

مراد: دى لأنها حاجة عامة ده تنظيم سياسى، لم يحدث فى العالم بأكملة إن تيجى جهة خارجية من خارج الحزب أو التنظيم السياسى وتجرى انتخابات

سرى للغاية

داخل الحزب! هذا غير موجود. إذا كان الاتحاد الاشتراكي هم أنفسهم مش واثقين فى بعضهم لدرجة إن مفيش ٢٠ واحد محل ثقة ييجوا علشان يشرفوا على الانتخابات يبقى باظ التنظيم السياسى كله! يعنى مفيش محل للكلام عنه إذا كنا إحنا مش واثقين فى بعض لهذه الدرجة، ودول أعضاء حزب فيما بينهم.

أظن هذه النقطة مافيهاش مجال للكلام، هم بيقولوا داخل الاتحاد الاشتراكى: إيه هو الضمان إن هؤلاء القيادات ماهماش هم - اللى زى سيادتك ما قلت - اللى موجودة حاليا علشان تجرى الانتخابات لصالحها؟ هو المعنى اللى سيادتك قلته: إن هؤلاء أعضاء اللجنة اللى هتشرف على الانتخابات لن تكون من القيادات اللى ماسكة مراكز فى الاتحاد الاشتراكى.

عبد الناصر: لا.. لا.. أنا عايز أجيبهم ناس محدش سمع عليهم خالص! (ضحك) لأن هى عملية التشكيك الحقيقة بلغت مدى كبير جدا، وحتى فى المؤتمرات لما تروحوا تقابلوا الناس الحقيقة الناس معندهاش كلام تقوله منبثق من تفكيرها الخاص؛ فالمشككون قلة فيبيلفوا ويدوروا ويتسمع الكلام نفسه هنا وهنا وهنا!

مراد: فيما يختص بالاستفتاء، الاستفتاء نفسه أو انتخابات مجلس الأمة على عيني وراسى ييجوا يشرفوا ساعة الانتخاب، إنما داخل التنظيم السياسى هذا غير معقول.

النقطة الثانية: لما كنا فى جامعة عين شمس وبعض السادة الوزراء كانوا هناك.

عبد الناصر: يوم السبت؟

سرى للغاية

مراد: يوم السبت واحد كان يثير نقطة، يقول: طيب إذا كان هؤلاء الأشخاص هينضموا الى المؤتمر لأن ماعندهم فرصة إنهم ينزلوا المعركة الانتخابية لأنهم يشرفوا على الانتخابات، طب ينتظر لحد ميعاد الترشيح ينتهى ويتفقل الباب ونختار أعضاء اللجنة ممن لم يرشحوا أنفسهم. فأنا قلت له بعد الاجتماع - محصلش فرصة إن أنا أتكلم وقتها إنما أخذته بعد الاجتماع - قلت له معنى هذا إننا بنجيب الناس السلبيين اللى خافين يواجهوا الجماهير ونقول لهم تعالوا إشرافوا على الانتخابات، إنما أنا عايز عناصر ماهياش معروفة، إنما فى الوقت برضه ماهياش سلبية، إيجابية وتيجى تتولى الإشراف على الانتخابات ثم تتضم بعد ذلك الى المؤتمر.

فيما يختص بأشخاص السادة الوزراء، ليس هناك شرط بأن السادة الوزراء يجب يكونوا أعضاء فى المؤتمر القومى أو فى اللجنة المركزية.. مفيش أى شرط. فسيادة رئيس الجمهورية بيختار الوزراء كيفما يشاء مفيش إلزام أن يكون الوزراء من المؤتمر القومى أو من اللجنة المركزية؛ ولذلك مفيش أهمية إذا كنا بعضنا هينزل الانتخابات أو مش هينزل، اللى مننا يحب ينزل الانتخابات ينزل واللى مش حابب ينزل مينزلش، ومفيش أى قيد فى اختيار السادة الوزراء.

وبعدين عايز أقول بالنسبة للأشخاص، سيادتكم متفكرش فى أشخاص المهم إن القيادة تستمر فى تنفيذ المبادئ، والمثل يعنى إحنا بان مننا ناس كويسين وكفاءات كثيرة فيه ٢٠ أو ١٠٠ أو ٢٠٠ يقدروا يحلوا محلى وناس أحسن منى، فيعنى سيادتكم ماتفكرش فى أشخاصنا.

عبد الناصر: قل لى أساميهم! (ضحك)

أصوات: (ضحك)

سرى للغاية

مراد: أرجو إن سيادتكم ماتفكرش فى أشخاصنا، وأظن أنا بأعبر عن الإخوة كلهم، إحنا لو مكناش فى الوزارة نقدر نشغل فى أى جهة أخرى.. كلنا نقدر نشغل كلنا يعنى الحمد لله ذوى خبرة وكفاءة، فأنا عايز أقول: سيادتكم بعد هذا الاختيار موجود وواسع والبلد مليانة ناس كويسة خالص.

فسيادتكم يعنى ما تتقيدش بأشخاصنا، وبعدين يعنى سيادتكم حر. بس هو السؤال اللى نحب نسأله: إحنا هانزل فى.. الوزراء؟ هو الوزير هينزل فى قطاع وزارته ولا فى الوحدة الاشتراكية اللى كان مقيد فيها قبل أن يكون وزيراً؟ يعنى أنا النهارده لسه مانقلتش قيدي الى وحدة وزارة التربية والتعليم، ودى منتقدة برضه وهيقولوا: الوزير يستغل نفوذه كوزير فى الوزارة وأثر على الموظفين اللى عنده وخلاهم انتخبوه! ولا ينزل فى القاعدة اللى كان مقيد فيها قبل كده؟ مثلاً أنا كنت فى الجامعة فأنزل مثلاً فى الجامعة.. يعنى هى دى النقطة محل التساؤل.

عبد الناصر: لا.. هو طبعا النزول فى الانتخابات، إذا دخلنا انتخابات مبيهمش نجوه ولا سقطوه والكلام ده. اللى بيهم الآتى: الواحد يشوف يقدر ينجح فى البلد خلاص يخش فى الحتة اللى يقدر ينجح فيها؛ اللى يقدر ينجح فى البلد يروح بنى مر مثلاً، واللى يقدر ينجح فى وزارته يروح وزارته، واللى يقدر ينجح فى الحتة اللى كان فيها فى الجامعة يروح الجامعة.

المهندس: هو بخصوص اللجنة، الاقتراحات اللى سيادتكم عرضتها فعلاً هترضى الرأى العام؛ لأن هو كان الخوف الأساسى اللى شوفناه فى المؤتمرات من إن جهات معينة تفرض أشخاص على الاتحاد الاشتراكي. ولما كنا بنقول: إن السيد الرئيس بيشكل اللجنة ويضمن حيدتها كان يستريح الناس، وكان

سرى للغاية

عندهم ثقة إن سيادتك قادر فعلا إنك تختار أشخاص هيضمنوا حيدة الانتخابات.

إنما هو فيه مسألة برضه غامضة عند الكثيرين فيما يتعلق بإعادة تشكيل الاتحاد الاشتراكي؛ لأن هو إعادة تشكيل الاتحاد الاشتراكي ليس معناه تغيير طبيعة الاتحاد الاشتراكي، لأن الاتحاد الاشتراكي تنظيم سياسى يؤمن بمبادئ معينة اللى هى المبادئ الاشتراكية. مش معقول إننا هانفتح باب الاتحاد الاشتراكي وقيادات الاتحاد الاشتراكي لأن تكون قيادات رجعية، ومش متصور أبدا؛ لأن البعض كان بيألسنى فى مؤتمر الجامعة.. وهتسمحوا للمعزولين يدخلوا، ولآ هنتمسكوا بالمعزولين سياسيا؟! قلت له: قصدك يعنى الإقطاعيين إنهم يخشوا الاتحاد الاشتراكي؟ فكان الرد طبعا بسيط: بإن ده هو الاتحاد الاشتراكي المعبر عن قوى الشعب العاملة وإن له خط معين وهو الخط الاشتراكي.

وطبعا بالنسبة لانتخابات الاتحاد الاشتراكي، قطعاً لا يمكن أن توكل لجهة قضائية، وده وضع طبيعى وسيادتك شرحته، وأظن برضه إنه شرح فى الجامعة ومقتنعين إخوانا إن الاتحاد الاشتراكي مختلف عن مجلس الأمة وغيره. إنما لازم نوضح برضه إن الاتحاد الاشتراكي لن يكون أبدا ميدان مفتوح علشان كل واحد يبرز فيه، حتى لو كان إقطاعى أو عبود باشا مثلا يبقى قيادى من قيادات الاتحاد الاشتراكي.

بالنسبة لأشخاصنا فيما يتعلق بعملية الانتخابات، أحب أؤكد المعنى اللى قاله الدكتور حلمى: سيادتك متهتمش بأشخاصنا أبدا. القرار اللى سيادتك هتتخذه فيما يتعلق بتشكيل اللجنة، ناس يهمننا استمرار الاتحاد الاشتراكي واستمرار الثورة؛ سواء إحنا قدرنا ندخل الانتخابات أو مقدرناش ندخل الانتخابات، سواء كنا وزراء أو غير وزراء مؤمنين بالخط ونقدر ناكل عيشنا.

سرى للغاية

عبد الناصر:

الموضوع مش موضوع أكل عيش! (ضحك) هو طبعاً بالنسبة للمؤتمر القومى، الوزراء سواء كانوا فى المؤتمر أو مش فى المؤتمر هيحضروا معاً باعتبارهم وزراء الاتحاد الاشتراكى، ويمكن هيتكلموا فى كذا وكذا سواء كانوا فى اللجنة المركزية أو مكانوش فيها هيحضروا اجتماعات اللجنة المركزية، وهيتكلموا فى المواضيع أو أصحاب الناس اللى ليهم مواضيع مطروحة هيتكلموا لآخر العملية دى. ولكن الحقيقة الموضوع اللى كان فى ذهنى من الأول.. كان فى ذهنى وأنا بأعمل البيان، العملية زى ما قلت لكم الوزراء كلهم يتعينوا لأن هو القانون مرن.. قانون الاتحاد الاشتراكى قانون مرن جداً. اللى الواحد شافه من مؤتمراتكم ومن الحاجات اللى ماشية، إن فيه ناس منقسمين الى قسمين.. فيه ناس بتقول انتخابات إيه هو دلوقتى فيه لازمة للانتخابات مش فاهم إيه وبتاع إيه؟ وناس بتقول: لأ.. لازم الانتخابات تكون فى كل حاجة، ولازم العملية تمشى بالانتخابات.. ده اللى خالنى الحقيقة عرضت الموضوع النهارده.

الشافعى:

هو الحقيقة أرجع برضه لقانون الاتحاد الاشتراكى، لما بدأ فى وضعه موضع التنفيذ مشى لحد مرحلة معينة ويعدين ماستمرتش بقية المراحل، ويعدين التجأ للاتحاد لمجال للتعيين عن طريق اللجان القيادية. ودائماً عملية التعيين بيبقى عليها تركيز وبتتعين مهما كان الاختيار ممتاز. الحقيقة اللى سيادة الرئيس أعلنه، هو لقى صدى ورد فعل إرتياح عام؛ لأنه الإحساس إن عملية الانتخاب هيبقى المجال مفتوح لمن يستطيع أن يثبت وجوده فى القاعدة بتاعته، وما من شك الجهد بتاع الاتحاد الاشتراكى والتنظيم هixely النتيجة والصورة مختلفة فى بعض المواقع. ولكن بعض المواقع هيبقى الواقع بتاعها أقوى من الجهد اللى اتعمل

سرى للغاية

فهتكون تعبير عن حقيقة.. وده ميخوفش لأنها هتبقى مراكز نائية أو بعيدة أو مناطق محدودة مأمكنش فعلا التأثير الفعال بالنسبة ليها فى الاتحاد الاشتراكى. ولكن اللى مهم أوى أوى إن الناس هتحس باطمئنان إن فيه قانون للاتحاد، وهذا القانون يوضع موضع التنفيذ والجهد بتاع العمل السياسى هيثبت وجوده فى المواقع المختلفة.

النقطة بتاعة الـ ٢٠ كانت بتخلى الناس متقدرش فعلا تركز على ناس باينة بشكل واضح، وإذا كان فعلا هيحدث تعديل العدد بتاع العشرين ده هيقبل، يعنى مفيش شك إن الموضوع هيكون أكثر فاعلية فى تحديد الناس اللى هي هتقدر تمثل الاتحاد الاشتراكى فى الوحدات الأساسية المختلفة.

عبد الناصر: هو العيب فى الـ ٢٠، إحنا كنا بنقول لازم نحط الـ ٢٠ اسم بس هو إحنا هنعمل حاجتين.. إحنا هنقل العدد، وبعدين اللى هيمنتخب يحط الاسم اللى يعرفه. يعنى مش ضرورى إذا قلنا ١٠ اللجان ١٠ إذا كان حط ٣ فى الأول تعتبر الورقة باطلة لأ، دلوقتى بنقول: إذا حط ٣ بس تعتبر الورقة سليمة.

الشافعى: هو فى وقتها كان خوفنا إن تيجى أسرة معينة فى منطقة من المناطق ماتخليش إلا العدد بس اللى هو ياخذ أكبر عدد من الأسماء؛ فبهذا يؤدي بالتالى الى إن النتائج هتبقى فى إيد هذه القلة اللى تستطيع إنها تأخذ أكبر عدد نسبيا.

عبد الناصر: هنعلم أى علامة على اللى دخلوا الانتخابات؟

سرى للغاية

سليمان: هو يعنى كمرج للعملية دى، أنا أتصور إنه تكوين المؤتمر القومى يستهدف فى المقام الأول تكوين اللجنة المركزية. اللجنة المركزية هيكون لها دور كبير جدا، لأنه هيكون لها نشاط وهيكون فيها لجان مختلفة. حتى يمكن أى عضو يمارس نشاط فى هذه اللجان، لازم يكون على درجة معينة من الوعى. قرار الاتحاد الاشتراكى ميمنعش إن المؤتمر القومى ينتخب أعضاء اللجنة المركزية من بين أعضاء المؤتمر القومى. إذا إذا سلمنا بهذا يبقى ممكن إننا نرشح فى المؤتمر القومى عناصر نعتقد إنها على درجة كبيرة من الصلاحية للجنة المركزية، وفى الحاله دى يبقى فيه انتخاب من المؤتمر القومى لأعضاء اللجنة المركزية.. بالطريقة دى نتجنب كل الإجراءات الخاصة بالانتخاب سواء للوزراء..

عبد الناصر: ماهى اللجنة المركزية؟ اللجنة المركزية هي عبارة عن لجنة تتبثق عن المؤتمر القومى لتقوم بعمله فى غير أدوار انعقاده.

الشافعى: صدقى شاغله الجانب الفنى.

عبد الناصر: إذا كانت لجان يقدرها يجيبوا فنيين زى مجلس الأمة.. يجيبوا فنيين من أى حنة، يعنى الفنيين دول بيبجوا فى اللجان.

حجازى: هو فى بعض اللقاءات هو الخوف من بعض أسماء فى اللجنة اللى هتضاف الى المؤتمر، يعنى يمكن مش التشكيل بالتعيين ولكن فى مخيلة بعض الناس؛ لأن فيه عناصر ليها اتجاهات معينة ربما تقرض فى هذه اللجنة.

سرى للغاية

عبد الناصر: أوضح شوية.

حجازى: الإحساس بأن يعنى القيادات يصح يكون لهم اتجاهات يسارية، وبالتالي يخاف إن بعض هذه الأسماء تظهر فى اللجنة، وبالتالي تبقى قادرة على السيطرة على اللجنة وعلى الاتحاد الاشتراكى وعلى اللجنة المركزية فى المستقبل وبالتالي..

عبد الناصر: أنا مش شايف حد له اتجاهات يسارية، الوحيد اللي عمالين يقولوا عليه إنه شيوعى وإنه مندوب الاتحاد السوفيتى هو على صبرى مش كده؟! إنما بعد كده مفيش حد تانى ليه اتجاهات يسارية فى الاتحاد الاشتراكى ولا فى مجلس الوزراء! (ضحك)

أصوات: (ضحك)

حجازى: إذا سمحت لى أوضح بعض النقط، برضه ربما بعض اللي كان له بعض الاتجاهات وظهر فى الأمانة العامة فى بعض الأوقات وظهر فى بعض المناصب القيادية واللى احنا..

عبد الناصر: الأمانة العامة فيها حد يسارى؟!

حجازى: كان يسارى كان يسارى ثم أصبح فى الخط الاشتراكى مازال برضه يتقال عليهم إنهم يساريين!

عبد الناصر: إبراهيم سعد الدين قصدك يعنى؟

سرى للغاية

حجازى: آه.. بالضبط كده بعض الناس وبعض القيادات الأخرى الموجودة.

عبد الناصر: هو إبراهيم سعد الدين إحنا قفلنا المعهد! (ضحك)

أصوات: (ضحك)

عبد الناصر: لأن طلع المعهد بيلم ناس ويديهم أفكار، وبعدين يعرفهم ببعض ويطلعوا برضه ويكونوا كتل وقلتانين للاتحاد الاشتراكى.. يعنى هو ده مين تانى يسارى فى الأمانة؟

حجازى: برضه فى الثقافة بيتقال: إن الدكتور عبد الرزاق حسن يعنى بعض العناصر القيادية.

عبد الناصر: عبد الرزاق حسن ده مع ثروت. (ضحك)

حجازى: أنا بادى سيادتك أمثلة لما يقال لدى الشعب أو من الإحساس العام لبعض الناس، بعض الناس كان ليها بعض اتجاهات معينة يعنى لو اتحطت مثل هذه الأسماء؛ هم وطنيين النهارده هم ماشيين فى الخط الاشتراكى وكل حاجة، إنما مجرد ظهورهم فى مثل هذه المواقع بيخلى إحساس! طبعا الخوف من الطرف الآخر اليميني المتطرف مش موجود إطلاقا يعنى إن هو يتحط فى اللجنة، هل ممكن التركيز على نوعية العنصر الوطنى اللى يختار فى هذه اللجنة؟ ويمكن سيادتك فى الكلام اللى قلته النهارده إنها عناصر مش بالأسماء اللى ربما الغالبية تنتظر إنها..

سرى للغاية

عبد الناصر: معدنيش أسماء، والله ولا اسم ده ولا أعرف أنا بقول أفكار.

حجازى:

هذه الأفكار قطعا هي منتظر إنها تريح الشعب فيما يتعلق باختيار هذه الأسماء. النقطة الثانية يافندم: إنه بيخلى الاتجاهات كلها فى المناقشات ماتخليناش نخاف برضه من ضرورة وضع لجنة على مستوى. دى ثورة ودى حركة، وفى المرحلة اللي جاية محتاجة الى عناصر قادرة على حماية أى انحرافات لأنه مهما عملنا من ضمانات لوصول عناصر قادرة الى المؤتمر الوطنى فى الـ ١٥٠٠، هذه الضمانات برضه هنبص نلاقى عناصر كثيره بتصل وفيه تكتلات بتبدأ فى مواقع كثيرة، زى ما إحنا شايفين فى الأيام الأخيرة من بيانات أو من تجمعات.

فأنا شخصيا مش خايف من إن اللجنة تبقى على مستوى ٣٠ أو ٤٠ أو ٥٠، طالما إن وسائل الاختيار بتكفل إنها عناصر وطنية ومخالصة وأمينه، أنا شخصيا شايف برضه إن السادة الوزراء سواء بالتعيين أو الاختيار، لازم يسلكوا طريق الى المؤتمر الوطنى لأن احنا بنقول: الوزراء بيقيموا النهارده بعمل فنى وعمل سياسى؛ فبالتالى واجب والله إن عدد معين لازم يدخل المعركة الانتخابية. ومفيش ما يمنع لو أن البعض مايقدرش يخوض المعركة الانتخابية، بيتعين برضه؛ لأن ده دليل على إن العمل السياسى له قيمته.

أنا متصور لو الوزراء مدخلوش كلهم اللجان سواء بالتعيين أو بالاختيار، ما هتبقى الصورة الثانية برضه واضحة إنهم انضموا الى المؤتمر أو حضروا المؤتمر أو حضروا اللجنة المركزية. فأنا شخصيا بقول يافندم: لو إذا كان السادة الوزراء يحبوا يدخلوا يدخل البعض كإنتخاب، وبعدين على ضوء الصورة اللي بتتبلور فى النهاية؛ بنقدر يعنى

سرى للغاية

نضمن إن بعض المسؤولين فى هذه القيادات يبيقوا داخلين المؤتمر كجزء أساسى يعنى.

عبد الناصر: طبعا هو عادة فى البلاد، ليه أنا قلت الكلام اللى قلته الدور اللى فات؟ يعنى مثلا لما بيحى مؤتمر حزب العمال بيحصل انتخابات للمؤتمر وبيحى أعضاء المؤتمر، لكن automatic أعضاء مجلس الوزراء بينضموا للمؤتمر automatic، طبعا دى عملية ماشية بقالها سنين طويلة. فيه بلاد أخرى اللى هى اللجنة المركزية، اللجنة المركزية بتعمل مؤتمر، فautomatic فاللجنة المركزية بتتضم للمؤتمر على طول بدون ما تدخل الانتخابات.

إحنا الحقيقة مشكلتنا إننا بنعمل انتخابات فى الظروف اللى إحنا بنتكلم فيها دى، كلها عملية التشيكك الواسعة.. التشيكك فى كل شىء، وفى نفس الوقت بنعمل الانتخابات ومعندناش اللجنة المركزية اللى نقدر نخليها. لكن الوزراء فى حزب العمال هم أصلا بيتخبوا قبل كده، أو جزء كبير منهم بيتخبوا كواحد زعيم الحزب وواحد نائب، والباقى بيبقى فى حكومة الظل shadow cabinet بالنسبة للنظام الغربى.

داود: من المؤتمرات والندوات اللى حضرناها، كان الاعتراض من البعض على مبدأ التعيين، النقطة الثانية بالنسبة للوزراء.

عبد الناصر: لا.. هو الاعتراض على تقويت ناس يمكن أكثر منه على المبدأ، لأن هنفوت ناس هيقولوا هم دول هيبقوا مراكز القوى الجديدة! هو ده الاعتراض.

سرى للغاية

داوود:

النقطة الثانية بالنسبة للسادة الوزراء: بدون الدخول فى قانون تنظيم الاتحاد الاشتراكى، بقول: دول نعينهم كأعضاء مجلس وزراء دول ينضموا للمؤتمر بحكم هذه الصفة، ولو إنه ماعدش وزير يبقى الوزير الآخر يشغل هذه الوظيفة السياسية بحكم الصفة، ويجب أن يكون موجود فى المؤتمر بصفتهم وليس بأشخاصهم.

هو فى الحقيقة أنا عاوز أفكر من زاوية أخرى، وهى إن احنا بنتصور أن بناء الاتحاد الاشتراكى تم. ماهو دور الاتحاد الاشتراكى فى تكوين الوزارة، ومن أى مستوى بينتقى الوزراء؟ أنا بتصور النهارده إن احنا خلصنا بناء الاتحاد الاشتراكى، وبنبتدى إن احنا نفكر نعمل بناء مقابل وهو البناء الوزارى والحكومة.. والى آخره، فمن أى مستوى علشان نتصور يعنى من أين ينبع الوزير؟ وما هو موقعه من البناء السياسى اللى احنا بنجربيه؟

وعلى ضوء هذا بفكر رحلته اللى هيقطعها من القاعدة هتوصل لغايه فين؛ علشان يبقى الشكل سليم ومتناسق مع ما نبغيه من وجود للتنظيم السياسى ودوره فى خلق القيادات التنفيذية، خصوصا على أعلى مستوى متوازى مع مستوى التنظيم السياسى.. ودى الفكرة اللى بتحدد تفكيرنا من حيث الدخول أو عدمه.

هو فى الواقع إن الشكل الكامل لشكل صورة الاتحاد الاشتراكى ووسيلة تكوينه من قاعدته الى قمته، لسه لم يتبلور فى صورته النهائية؛ ولذلك الوزير هايحط رجله على أول السلم وهو الانتخاب من اللجان القاعدية الانتخابية، وبعدين هيصل لفين؟

نتصور إن دخلنا كمجموعة وبعدين واحد وصل الى مستوى المركز وواحد وصل لمستوى وواحد وصل الى مستوى اللجنة المركزية.. والى آخره، وبعدين الصورة فى النهاية هيبقى شكلها إيه أمام الجماهير؟

سرى للغاية

يعنى الصدى أمام الجماهير لوزير لم تمكنه الظروف أو لأخرى إنه يصل الى أكثر من مستوى المركز أو ليصل الى أكثر من مستوى الموقع الصغير اللى هو فيه. ده اللى هيحدد الحقيقة تصورنا، قد نجد أنه فى هذه الحالة يبقى هناك حكم وقتى بنواجه به صورة وقتية نظرا لأن الوزارة موجودة سابقة على وجود التنظيم، على أن يكون هناك قاعدة أخرى بتحدد الموقف بصفة دائمة. لأنه فى الواقع أنا قاعد أتصور يمكن بالنسبة لى أنا عملية سهلة فى محافظة وقرية وهاقدر آخذ السكة، إنما باتصورها فى مواقع أخرى تتشابك فيها الصلات وتتعدد، كيف تكون الصورة فى النهاية بعد اكتمال كل هذا البناء؟ وبعدين كل واحد فى موقع.. شكلها كده مش عارف يبقى إزاي؟

ففى الواقع أنا عايز أتصور إن احنا كونا الاتحاد الاشتراكى، بعدين الاتحاد الاشتراكى بيكون وزارة أو له دور فى تكوين وزارة.. قطعا ده يكون. فلا بد إنه هياتى بهذه الوزارة من مستويات معينة يعنى لها كفاءة سياسية معينة، وصلت لمواقع سياسية تؤهلها أنها تصل الى هذا. مش معقول هيجيب وزير لم تمكنه كفاءته السياسية إنه يصل مثلا.. إنه عضو فى لجنة قاعدية وموصلش لأى مستوى!

بأتصور هذا فى التنظيم بتاعتنا، لذلك دى يعنى نقطة انطلاقنا فى التفكير فى الموضوع.

عبد الناصر: يعنى أنا فى تفكيرى بالنسبة للوزير، مش ضرورى يكون وصل الى لجنة؛ لأنه ممكن يكون عضو فى الاتحاد الاشتراكى وفى مجاله بالنسبة للتخطيط، بالنسبة لكذا يستطيع أن يقوم بعمل.

سرى للغاية

الكلام اللى إنت بنقوله يمكن هيجى بعد سنين، بل بالعكس يمكن أنا مش فاكرك الكلام اللى أنا كاتبه ده حصل ولاّ ماحصلش، اللى أنا متصوره إنهم فى يوغوسلافيا عملوا الوزارة ولقيت اللجنة المركزية..

مرعى: بقت دلوقتى فى تشيكوسلوفاكيا.

عبد الناصر: لا بالنسبة ليوغوسلافيا، ماعملوش الجمع بين الوزارة وبين اللجنة المركزية. كان الأول الوزارة من اللجنة المركزية، أنا شوفت التعديل اللى عملوه فى الآخر إن الوزراء اللى فى الوزارة ناس واللجنة المركزية ناس آخرين، والعمليات اللى ماشيين بها فى يوغوسلافيا بحيث إنهم ييفصلوا المجتمع فصل كامل.

حتى بالنسبة لمجلس الأمة، بالنسبة للجنة المركزية عندهم بالنسبة للبرلمان أيضا فصلوا بين ده وبين ده فى العمليات اللى عملوها الآخر، إبقى شوف لنا ياعبد السلام.

وبعدين فى الكلام اللى بيتكلم عليه السيد مرعى الخاص بتشيكوسلوفاكيا، الوزارة الأخيرة نصها بس أو أقل من نصها جت من اللجنة المركزية - الواحد كان متتبع العملية - أقل من النص اتاخذ من اللجنة المركزية وجم ناس فنيين. ولكن هو الوضع فى يوغوسلافيا إن فيه ٣ أحزاب أساسية؛ قصدى إن احنا فى هذا الموضوع نبقى مرنين، لكن مع الاتحاد الاشتراكى هياخذ وقت علشان يتبنى وعلشان يبقى يطلع الوزراء السياسيين.

مرعى: سيادتك أنا يبدو لى فى الموضوع بنظرة عاجلة، إنه سبب التفكير والتردد نوعا ما والأخبار اللى جات فى المؤتمرات، هى ماجتتش من نقطة اللجنة

سرى للغاية

الحيادية يعنى معتقدش إنه فيه كلام بالنسبة لوجود لجنة حيادية، إنما الكلام جه لضم اللجنة الحيادية دى مستقبلا الى المؤتمر. فتصورى إنه لو أجريت الانتخابات فى داخل إطار الاتحاد الاشتراكى فى الوقت الحالى، بتجيب الكلام اللى سمع فى المؤتمرات، واللى ملخصه قدرت أشوفه بعد الفترة اللى تعبت فيها.

اللجنة - زى ماقال الأخ رياض وكان بيستفسر - لها مهمة معينة بالنسبة للانتخابات. المهمة المعينة أنا فى رأى إنها ماهياش عسيرة وماهياش مصدر إشاعات، والدليل القائم على هذا الانتخابات التى أجريت فى مجلس الأمة.. الانتخابات الأخيرة فى مجلس الأمة. يعنى اللى عاصروا ودخلوا انتخابات كثيرة، أنا بأكد لسيادتك مشفناش انتخابات يعنى كاملة، حتى بتوع العهد اللى منتمين للعهد متساويين تساوى كامل حتى مع الناس اللى كانوا ضد الثورة ومرشحين وكانوا دخلاء، كانوا متساويين تساوى كامل، ومشوفناش نوع من تدخل إدارى على أى صورة من الصور حصل فى أى دائرة من الدوائر - وأنا بركز هذا على الدوائر الانتخابية - بالعكس كانت انتخابات حرة كاملة.

يبقى إذاً لما بنيجى إحنا نقول إن بنعمل لجنة حيادية لإجراء الانتخابات الناس هتصدقنا، وممكن أوى فى انتخابات مجلس الأمة الأخيرة كمثل قائم يعنى، سيادتك أصدرت قرار فى الفترة الأخيرة بتاعت انتخابات مجلس الأمة إنه أى واحد يقدر يرشح نفسه، وصدر قرار بإنه اللى ينتمى الى لجنة تأسيسية معينة يقدر يرشح نفسه فى الحقة الثانية. يعنى أبيع الموضوع وانفتح ومكانش فيه اعتراض، كان فيه عزل لكن مكانش فيه اعتراض على الأسماء، كل واحد يخش بدليل إن الدوائر كان فيها ١١ و ١٢ و ١٣ و ١٤ و ١٥، وأجريت الانتخابات على هذه الصورة. النهارده الصورة مبسطة ليه بنعقدها؟ الصورة مبسطة..

سرى للغاية

أولاً: دى مش انتخابات مجلس الأمة دى انتخابات على مستوى الاتحاد الاشتراكى.

ثانياً: إن هناك لجنة حيادية بتشرف على هذه الانتخابات.

ثالثاً: ليس من الوجوب أن اللجنة دى لازم عددها يبقى صغير فعلاً لأن إيه هى مهمتها؟ ده مهمتها مهمة رقابة انتخابية معينة؛ فاللجنة دى بتراقب ونضمن بيها الحيادة فى الانتخابات. لا يوجب أبداً أن هذه اللجنة أو أعضاء هذه اللجنة ينتموا الى المؤتمر القومى، مفيش موجب إنما مفيش ضرر إن آخذ منهم يعنى أنا فى رأى إن عددهم مايزيدش عن ١٥. دى لجنة حيادية ١٥، بتشوف شكوى بتيجى فى حته من الحنت بتقول إن المحافظ يتدخل فى الانتخابات، بتقول: إن أعضاء الاتحاد الاشتراكى تجمعوا وعملوا، بتروح هذه اللجنة واحد من ال ١٥ يجرى عملية تحقيق إدارى بحت.

بعد كده من ال ١٥ دول ما ناخذ ٢. بعد كده أنا أقدر أعين فى المؤتمر القومى مش ٥٠ أقدر أعين ١٠٠ ومايكونش فيه اعتراض عليهم، إمتى؟ لما تتم الانتخابات بس مش قبلها.. يعنى لما تتم الانتخابات بتاعة ال ١٥٠٠ بتوع أعضاء المؤتمر القومى، وأجى أقول: مع ال ١٥٠٠ دول هاحط ٢٠٠ من ذوى الخبرة. فى تصورى محدش هيعترض، بالعكس هتلاقى طابور من الناس ومحدش يعترض لأن الانتخابات تمت أولاً.

هو الاعتراض ببيجى منين؟ الاعتراض ببيجى لما أنا أسبق بالتعيين. أتصور مثلاً مجلس الأمة.. مجلس الأمة كذا عضو وأسبق مجلس الأمة أعين ال ٣٠ إسم أو ال ١٠ قبل إجراء الانتخابات. ببيجى الاعتراض من أى مرشح لأن أى مرشح داخل معركة أمامه، ويشوف واحد غيره يعين فى نفس الكرسى اللى هو بيسعى إليه طبعاً بيترك مرارة فى النفس، إنما لما يكون التعيين تالى للانتخابات ما يجيش..

سرى للغاية

عبد الناصر: هو الخوف إن اللى هيتعينوا هيبقوا مراكز قوى بس هو ده الموضوع، يعنى إيه مراكز قوى؟ يعنى محسن أبو النور مثلا بيعتبروه مركز قوى، شعراوى جمعه بيعتبروه مراكز قوى.

مرعى: طب مكانوش يخشوا المؤتمر يافندم، هم ناس حياديين لمهمة معينة بيعملوها، يعنى مش كل واحد يقدر يخش اللجنة.

عبد الناصر: التفكير فى هذا الموضوع، الواحد فكر يجيب ٥٠ كويسين يعنى، فهقول لهم: ماتدخلوش المعركة الانتخابية وتعالوا إشرافوا؟! طيب إنتم ٥٠ البلد كلها هتبنى عليكم أو أى عدد طب إشرافوا. أقل حاجة إنهم هينضموا للمؤتمر اللى هيطلع ١٥٠٠، وده موضوع أصلا اتقال خلاص.

مرعى: أنا شايف العدد يقلل ومفيش ضرر منه ١٥ أو ٢٠.

جمعة: هو أكرم لنا كوزراء إننا نخش الانتخابات الحقيقة، ووصولنا الى المؤتمر وإحنا معينين موقفنا بجانب أعضاء المؤتمر الآخرين، أعتقد هيبقى شوية! فى الوقت نفسه لو سيادتك أعلنت النهارده إن أعضاء اللجان التنفيذية العليا والأمانة العامة والوزراء هبخشوا المؤتمر بالانتخاب، ثق سيادتك إن أى كلام عن اللجنة هينتهى ولن يثار أى كلام بعد كده عن اللجنة إطلاقا. هى الفكرة مين اللى هيعين فى هذه اللجنة؟ ده السؤال اللى بيدور. فالحقيقة عملية الانتخاب، أنا باعتقد هى تجربة سياسية مفيدة لنا الوزراء وأكرم للوزراء إنهم يخشوا الانتخابات، وممكن تتنسق العملية بحيث إن الوزراء ميصدوش بعض، حسب القواعد اللى يقدر ينزل فى البلد ينزل اللى

سرى للغاية

ينزل فى وحدته ينزل، لكن المهم أن يحصل تنسيق بحيث إن كل السادة الوزراء يوصلوا الى المؤتمر.. ده اللي يهمنى فعلا.

عبد الناصر: طبعا أنا اللي يهمنى، فى تفكيرى إن الوزراء كلهم بيقوا موجودين فى المؤتمر. كمان ماحناش عايزين الدنيا تفلت منا فى المؤتمر، مش نبص نلاقى جت لجنة مركزية معادية؛ بهذا نبقى سلمنا الاتحاد الاشتراكي وندور إحنا نعمل حزب تانى بقى! (ضحك) ولو إن الواحد مش خايف يعنى للدرجة دى؛ لأن الموضوع طبعا فى المؤتمر هيحصل lobbying.. ضغط وهيحصل اتصالات ومش فاهم إيه.

صدقى: طيب هو بالنسبة للجنة، جه فى البيان إن اللجنة هتخش المؤتمر. الجزء اللي مخوف الناس أنها بالتعيين ثم ستدخل المؤتمر بطريقة أوتوماتيكية. الخوف هو من أن تشكل عناصر هى فى ذهن الناس تمثل مراكز القوى، فأعتقد إن التفكير اللي سيادتك ذكرته - وهو أنها لن تشكل من الأسماء اللي تشكل فى ذهن الناس مراكز قوى - هو ده هيقضى على هذه العملية. لأن ظهور الأسماء بعد تشكيل اللجنة، هيبان إن كل ما قيل: إنها معمولة عشان ناس معينين يخشوا، لأ.. مش حقيقى لأن هذه الأسماء غير موجودة كلها.. ده الجزء الأول.

فإذاً اللجنة تشكل من ٢٠ أو أى عدد زى سيادتك ماقلت، والأسماء تقضى على كل ما قيل إن تشكيل اللجنة وسيلة لدخول فلان وفلان الى المؤتمر ثم الى اللجنة المركزية.. هذه النقطة ماتخوفناش.

سرى للغاية

عبد الناصر: هنا نقطة أحب أسألك.. إنه انتخب فى اللجنة المركزية بصفته وزير فانتخب فى اللجنة.

صدقى: فبقى خلاص أصبح فى مركزه فى اللجنة المركزية بالانتخاب.
النقطة الثانية: فيما يختص بالوزراء: أنا أعتقد إن الوزراء فريقين.. فريق يرى إنه يخش الانتخابات وقادر على إنه ينجح فى الانتخابات، وده يجب ألا يحرم من هذه الفرصة يخش الانتخابات. الآخر مفيش مانع إنه لا يدخل الانتخابات، ولا يكون عضو فى المؤتمر ويبقى يحضر الاجتماعات فى المؤتمر بالصورة اللى سيادتك ذكرتها كعضو مجلس وزراء.

معنى هذا، إنه إذا خرج من الوزارة الوزير الذى يحل محله هو الذى يحضر المؤتمر فى هذه الحالة. أما المنتخبين الى المؤتمر ثم الى اللجنة المركزية عن طريق الانتخاب، فقول مستمرين فى المؤتمر سواء بقوا فى الوزارة أو خرجوا من الوزارة.
النقطة دى، هل الوزير اللى مانتخبش يحضر فى المؤتمر كوزير وليس عضو فى المؤتمر؟

عبد الناصر: يحضر كمراقب.. كمستمع يعنى.

صدقى: يبقى الحقيقة الاعتراض اللى سيادتك ذكرته دلوقتى، بيرجح إنه يحضر كمراقب، هذا الاعتراض يبقى علشان مايوصلش للجنة المركزية بالانتخاب لم ينتخب أصلا، أنا شايف إن طالما انتخب من المؤتمر الى اللجنة المركزية..

سرى للغاية

عبد الناصر: طبعاً أنا بناقش هذا الكلام ليه؟ طبعاً أنا عايز الوزراء.. أكبر عدد من الوزراء يدخلوا اللجنة المركزية، وإلا إزاي هامسك اللجنة المركزية؟ برضه ماهو بيكم وإلا هتبقى مشكلة!

صدقى: ولذلك أنا بأغلب الرأى، طالما إنه منتخب إذاً أنا بطالب إن دخوله اللجنة المركزية يبقى بالانتخاب مش بالفرض.. يعنى دى مافيهاش حاجة.

النقطة الثانية اللى لازم ناخذ بالننا منها: هى موضوع ترشيح الوزراء فى الانتخابات، إنه يعنى إذا مكانوش ينجحوا نسبة غالبية منهم برضه شكلها وحش! فعلا اللى يفكروا يدخلوا المعركة الانتخابية، يجب أن تكون فرصة نجاحهم كبيرة حتى إن صورة أعضاء الحكم مخذلوش فى الانتخابات.

ودى الحقيقة نقطة مهمة جداً، بترجح فعلاً إن كلنا مش نخش الانتخابات، يعنى لو كلنا نخش الانتخابات وكلنا ما ننجش تبقى يعنى! ودا مش عيب فى الأشخاص، إنما يعنى فيه مننا ماجاتلوش الفرصة إنه يتعرف فى مناطق معينة بالقدر الكافى.

النقطة الأخيرة يافندم اللى أحب أذكرها: إننا يعنى متأثرين كثير بالكلام اللى قيل فى الاجتماعات بعد ما قيل مثلاً فى اجتماعات الأطباء أو أستاذ فى كلية. أولاً: عدد من تكلموا أو حضروا هم قلة، لكن طبعاً الرأى اللى بهذا الشكل بياخذ رنة فى الاجتماع. أنا أعتبر إن الرأى العام للشعب النسبة الغالبة العظمى هى فى صف البيان وفى صف هذا النظام، إنما فيه عناصر الثورة المضادة تشتغل فى مناطق معينة وبالذات بين أساتذة الجامعات وبين المثقفين، وتختار هذه الاجتماعات اللى بتحصل علشان بيان فى الصورة الناس ضد البيان.

سرى للغاية

أؤكد لسيادتك أنا حضرت فى قوص فى اجتماع يضم حوالى ١٠ آلاف واحد، الصورة بتاعة تعلق الناس بهذا النظام هى ما كانت عليه قبل ٥ يونيو ويمكن أكثر.. ودا ليس مجاملة أو غيره. أنا نفسى فوجئت يعنى أقول لسيادتك بصراحة: أنا كنت رايح منتظر صورة أخرى لقيت إن الصورة كما هى، ليه؟ لأن دول بعاد عن العناصر اللي احنا بنتكلم عنها. لكن لما بروح أنا لأساتذة كلية الطب، وسيادتك تعلم أن أغلب أساتذة كلية الطب فى وقت من الأوقات كانوا خايفين من الحراسات، وكانوا بيقولوا الدكاترة هيحطوهم تحت الحراسة كلهم.

عبد الناصر: طلبوا إننا نقلل القبول فى كلية الطب فى يوم ما ويعنى كانوا ضد انتشار حتى الأطباء.

صدقى: الحقيقة هذه العناصر يافندم، من الأول من قبل بيان ٣٠ مارس ومن قبل ٥ يونيو وهى معادية، وانتهزت فرصة الجدل وإن احنا فتحنا باب النقاش على مصراعيه، عشان تثير باسم الحرص على مزيد من الحريات بإنهم يثيروا التشكيكات. أنا بقول: ما قيمة هذه التشكيكات ومن تمثّل.. الذين أثاروا هذا ومن يمثلوا؟ وما نسبتهم الى الشعب؟ والحقيقة أنا اللي حاسس بيه إن احنا بنغالى فى قيمة هؤلاء الناس، لكن بطبيعة شعبنا الكلام المعارض الكلام اللي من هذا النوع بيتردد، أما الكلام المؤيد محدش بيردده! وأنا باتساءل.. هل الاجتماعات اللي اتعملت مع الفلاحين مثلا أو مع العمال حصل فيها مثل هذا الكلام؟ أعتقد لأ.

سرى للغاية

عبد الناصر:

أولاً أنا باختلاف معاك يا عزيز في هذا التشخيص وكنت ناوى أقول هذا الكلام، تشخيصى للموقف الداخلى بالتأكيد أنا بعتر أن فيه حالة موجودة إذا تجاهلناها ونسبناها الى عناصر الثورة المضادة بس يبقى بنشخص الموقف تشخيص غلط، ليه؟ لأن عناصر الثورة المضادة دى موجودة إمبارح والنهارده وهتكون موجودة بكره. إذا إيه اللى خلى عناصر الثورة المضادة دى النهارده تتكلم مثلاً؟ ليه ماتكلمتش إمبارح؟ ليه ماتكلمتش قبل ٥ يونيو؟

لأن هناك حالة موجودة، وهذه الحالة الموجودة فى البلد عاملة نوع من الهزة ونوع من الضياع بالنسبة لجماهير الشعب. وأنا كان ممكن أمسك الحالة دى من الأول وأضرب من أول يوم ونضرب رصاص ويموت ناس ومش عارف إيه، ولكن هم كانوا عايزين العملية دى كدا لسبب؛ الهزيمة أثرت على الناس والانهيال السريع، حتى الحرب بتاعتنا.. حرب الأربعة أيام وليس الستة أيام، وبعدين التحقيقات ومحكمة الثورة أيضاً أثرت على الناس، والكلام بتاع التحقيقات بتاع قضية المخابرات اتعرف، وفلانة كذا واللى كان بيروح واللى كان بيحى والكلام ده معروف فى البلد كلها!

فهذه الصورة هزت الحقيقة الناس كلها، وبيقولوا: طيب وإيه اللى يضمن لنا إن اللى حصل ده ما يحصل فى المستقبل؟! إذاً فيه حالة موجودة بالنسبة لجماهير الشعب اللى أنا بقول إنها جماهير غير معادية. تطلع على طول الثورة المضادة، ووجدت أى فرصة وبدأت تشك فى كل شئ.

إذاً النهارده فيه معركة بينا إحنا كقوى الثورة وبين الثورة المضادة، على إيه؟ مين هياخد جماهير الشعب الى جانبه.. هذه هى المعركة الموجودة.

سرى للغاية

إذاً لازم فى تكتيكنا وإحنا ماشيين لهذه العملية، نعمل خطة طويلة بحيث إن احنا نتفادى كل الوسائل اللى اتبعنها الثورة المضادة.. تشكيك الشعب والتشكيك فى كل شىء، وانتهاز هذه الفرصة ونقضى عليها ثم نعزل الثورة المضادة ثم نضربها.. دا الكلام اللى أنا باشتغل عليه.

وخط الابتداء فى هذا الموضوع إيه؟ خط الابتداء فى هذا الموضوع، أنا سألتكم هنا حتى إيه التغيير؟ وماخذتش أجوبة أبدا! لكن بنلم الكلام اللى جاى من هنا واللى جاى من هنا. وحتى كلمة الثورة المضادة، ماهى الثورة المضادة؟ إذا وجدت الثورة وجدت الثورة المضادة. إحنا استفدنا الفترة دى لأن احنا عرفنا من هم عناصر الثورة المضادة.

البيان الحقيقة هو نقطة بداية وليست نقطة نهاية، البيان الغرض منه إن احنا نأخذ جماهير الشعب كلها فى صفنا ونعزل الثورة المضادة. إذاً النهارده أما نتكلم فى عمليات، نقرا الرأى العام عموماً ونقول دى عمليات الناس بنتكلم فيها ومفيش داعى أبدا.

أنا باقعد كل يوم بأقرا الرأى العام، وبأقرا الكلام اللى حصل فى المؤتمر الفلانى واللى حصل فى كلية الطب واللى حصل فى نادى القضاء، اللى بيقوله الجدع اللى اسمه إيه ده ممتاز نصار.. اللى بيقوله مع الناس، أحب أعرفه.

والأحزاب اللى موجودة فى القضاء كلهم ٣ - ٤ أحزاب موجودة جوه فى القضاء، بأشوف ده بيقول إيه وده بيقول إيه وده بيقول إيه، ويلم الأسمى دى كلها الحقيقة. وبرضه بأشوف أساتذة الجامعة والمعنيين مين طالع؟ مين بيقول؟ مين كده؟ بأشوف فيه الشيوعيين. الشيوعيين بيتحركوا وبيشتغلوا ويتكتكوا، وطبعاً هم مش عاجبهم البيان، بيقولوا: البيان ده حد أدنى! كل العمليات دى الواحد شايفها.

سرى للغاية

بشوف أيضا إن فيه تنظيمات اتكونت فى الفترة اللي فاتت دى مانعرفهاش إحنا، بل تنظيمات بتتكلم على عمل سرى على اغتياالات على عمليات بهذا الشكل؛ تنظيمات بتلم الحاقدين.. الضباط اللي طلعا من الجيش، هدفها العمليات دى كلها.

تنظيمات فى داخل الجيش، ماسكين تنظيم لسه الأسبوع اللي فات فى داخل الجيش، عمليات كثيرة ماشية فى البلد والواحد شايف هذه العمليات. أنا لم أذعر أبدا فى الفترة اللي فاتت، شعراوى عارف إن أنا الصبح أطلبهم وأقول لهم: ياجماعة ده كلام بسيط، إحنا فى ٥٤ اللي شوفناه كان أد ده ١٠٠ مرة! فى سنة ٥٤ كان فيه مليون واقفين فى ميدان عابدين بيقولوا: يسقط جمال عبد الناصر.. مليون!

وأنا طلبت شعراوى وقلت له: ياشعراوى دول ٤ آلاف مش مليون. ويومها أنا طلبت سحب البوليس من البلد خوفا من إن البوليس ينضم للمتظاهرين سنة ٥٤، وكل ده فى شهر أمكن تغييره.

اللى بدى أقوله: إن العملية أطول وأعمق أيضا من إنها عملية النهارده، ولازم إحنا نشغل ونقول حكم ثورى وحكم عصرى ومش فاهم إيه، لأ.. إحنا لازم نكون أيضا حكم ثورى وإذا مكناش ثوريين فى عملنا مش هنقدر أبدا نضرب الثورة المضادة، الثورة المضادة هتضرينا.

يبقى عمليتنا النهارده علشان أعزل هؤلاء الناس عن الجماهير، الموضوع ده أنا مش خايف منه.. الموضوع ده ماببخوفنيش وده ماببخوفش وده ماببخوفش.. الى آخره. واتلمت المواضيع دى كلها واتحطت فى البيان أصلا.

والحقيقة البيان لما نزل لجم الناس دى كلها، وبتوع كلية الطب بيقولوا إيه: استفتاء إيه على بيان هو حد هيرفض الحريات؟! حد هيرفض طرد اليهود؟! مش معقول! طب ليه استفتاء على البيان؟! وطالبين فى

سرى للغاية

الكلام اللى كانوا عاملينه إن إلغاء الاستفتاء على البيان، ووقفوا واتكلموا الكلام ده وبيقولوا: الثقة الكبيرة فى الرئيس جمال عبد الناصر؛ فى آخر سطر فى البيان اللى جابوه لك وانت مارضيتش تأخده، أنا سمعت كده.

شقير: لا.. أنا خدته وإديته، لكن أنا مااستلمتوش أنا عارف البيان إيه. (ضحك)

عبد الناصر: وبعدين فى البيان بيقولوا: إذا لم يستجاب الى طلباتنا فسنخرج فى مسيرة ونجمع طلبات.

شقير: فى البيان مفيش كده يافندم.

عبد الناصر: لا.. قالوا فى المناقشة.

شقير: فى المناقشة.. مسالة نشر آرائهم فى الصحافة.

عبد الناصر: الى آخر هذا الكلام.

علما إن الجماعة دول بالذات ممكن الواحد يكتل الطلبة ضدهم لأن الضرب فيهم سهل جدا، أكثر مجموعة يعنى ضربها سهل جدا. ولكن البيان لجم الناس، الحقيقة مالاقوش حاجة يقولوا فيها غير اللجنة بس. وأنا قصى من اللجنة الحقيقة - وده أنا هقوله فى الخطبة يوم الخميس - قصى من اللجنة الحقيقة إننى أشيل من مخهم إن هيبقى فيه تحيز لناس معينين؛ اللى هم مرتبطين بالأمانة الموجودة فى الاتحاد الاشتراكى. هو ده قصى من اللجنة، ومحدث عبر عنه لغاية دلوقتى ومحدث قاله لغاية دلوقتى علنا.

سرى للغاية

ولما بنقوله بتنتهى عملية اللجنة، برضه قصى من اللجنة إن مايقولوش إن فيه مراكز قوى تانية لأن العملية بهذا الشكل تضمن الناس. قصى من البيان، إن هو يبقى نقطة بداية لأخذ الجماهير من الرجعية ومن الثورة المضادة وعزلهم، وماندش حتى الشيوعيين فرصة إنهم يلعبوا فى الناس وبنعزلهم. وحصل بعد البيان، حصل إن عدد من الشيوعيين فى كلية العلوم حاولوا إنهم يجيبوا الطلبة علشان يناقشوا البيان، الطلبة رفضوا، قالوا لهم: هناقش إيه ويتاع ومشيوا. وحصل فى كلية الهندسة محاولات لاستمرار مؤتمرات فى جامعة القاهرة ووقف كام واحد اتكلموا؛ البيان فعلا سكت كل ده.

لهذا أنا لما بتكلم الحقيقة فى مواضيع قد تظهر إنها صغيرة، لازم نعرف هدفنا إيه؟ هدفنا إن احنا بناخد الجماهير من القوى المضادة، وبعدين إحنا قدامنا السنة الجاية أصعب جدا من السنة دى.. ده موضوع بدى نحطه فى حسابنا ونفهمه كويس. يعنى إيه قدامنا سنة أصعب؟ يعنى السنة دى مفيش حرب، ماهنقدش نحارب.. إذاً ٦٨ مفيش حرب، مفيش إزالة آثار العدوان.

نبتدى ٦٩ معرفش أقول لك ٦٩ إمتى هانقدر نزيل آثار العدوان، ليه؟ هو متوقف على حاجات كتيرة جدا؛ بنكون قوات علشان نبقى متوازنين مع اسرائيل، فى نفس الوقت عايزين معدات وعايزين كذا. وبعدين رياض بيقول لنا إيه اللى حاصل، فمش باين بالسلام هنقدر نصل الى انسحاب إلا إذا استسلمنا.

إذا طالما اليهود موجودين فى مصر وحالة العدوان موجودة، هيبقى فيه فرصة لأعدائنا إنهم يعبأوا أكثر، وهنضطر الحقيقة فى أوقات إن احنا ناخذ إجراءات شديدة وإلا البلد هتقلت منا.

سرى للغاية

لأن الثورة لم تنتهى بالحرب، وأنا كنت بعتر إنها انتهت بالحرب وإن احنا خلاص! ولكن جه يوم ٩ و ١٠ أثبت أنها لم تنتهى. بعدين بالضغط الاقتصادى والكلام ده أيضا لم تنتهى، ولازم نعمل حسابنا وأنا كنت بكلم الأخ حسن عباس ويقول له: لازم نعمل حسابنا إن دولة من الـ ٣ دول فى وقت ما توقف.

وبعدين فاضل بقى إن احنا نسقط من الداخل، وبعدين فى هذا الموضوع ممكن تتعمل جهود كثيرة جدا، واللى قدامنا مثلا فيه فلوس بتتصرف.. يعنى فيه مجموعات من الحزبيين القدامى ظهرت معاها فلوس، فيه مجموعات تتجه الى أكثر من الكلام، وفيه ناس طلوعوا منشورات باسم التجمع الوطنى.

جمعة: التجمع الوطنى المصرى.

عبد الناصر: فيه حركات النهارده موجودة فى البلد لكن تقريبا الواحد شايفها كلها. السنة الجاية هتبقى إيه؟ هتكون الحركات دى هجومية أكثر و wild أكثر. لازم بنجهز نفسنا على أساس إن احنا نكون ثوريين أكثر السنة الجاية؛ لأن لا بد إن احنا هنضطر ناخذ صدام لأن النهارده مثلا الجامعات هتبتدى تاخذ الأجازة والطلبة هينشغلوا فى الامتحانات، هيجوا الطلبة فى سبتمبر هيرجعوا هيحصل إيه؟
قطعا كل القوى المضادة هتحاول إن تطلع مظاهرات تانى من الطلبة، إيه الإجراءات اللى احنا هناخدتها من هنا لأول سبتمبر؟ ولازم نثبت إن الحكم قوى والناس بتدى اعتبار للحكم القوى وتعمل له حساب.

سرى للغاية

لم الكلام مثلا من أبو نصير والناس اللي فى نادى القضا اللي قالوا: مش عايزين يدخلوا الاتحاد الاشتراكى! طب مين اللي قال لهم يدخلوا الاتحاد الاشتراكى أصلا؟! ده القضا مش من تحالف قوى الشعب العاملة، ده هم داخلين ضمن فئة المثقفين. يدخلوا أو مايدخلوش، ده موضوع اللي عايز يدخل.. يدخل، واللى مش عايز يدخل مايدخلش. فيقولوا هذا رضوخ! واحد بيقول دى مش موافقة هذا رضوخ، ولازم نعمل مطالبات أخرى بتغيير وزير العدل! سمعت يمكن هذا؟

أبو نصير: أيوه.

عبد الناصر: وبيخططوا كانوا لهذه العملية .

هو طبعا برضه العملية فى القضا فى السنتين اللي فاتوا حصل فيها لعب، والواحد ماخدش باله منها إلا فى الآخر؛ حصل لعب وبالذات عصام لعب فى هذا الموضوع وأنا لم أفطن لهذه العملية إلا أخيرا. ومعرش أنا هدفه إيه؟ هل هدفه شخصى أم هدف آخر؟ ولكن عملية يعنى حصل فيها لعب، وفيه اتصالات حتى بتحصل بينه لغاية دلوقتى وبين بعض الناس ولزقهم علشان عمل كذا. وأنا لما عرفت هذه المواضيع طبعا قبل ما يطلع من الوزارة، فوجئت جدا وتأكدت إن فيه حاجة! هى لا تعتبر عمل ماشى فى خطتنا، ولكن حاجة منفصلة وآثارها لازالت موجودة فى القضاء.

طيب إذا كنا هنسلم بالنسبة للقضاء، ومفيش نقض، ومفيش كذا، ومفيش كذا، هل هنكون ثوريين أو غير ثوريين؟!

هل فعلا اللي طبقت عليهم القرارات الاشتراكية هيفضل فى القضاء؟ هل اللي اتعين أيام إبراهيم عبد الهادى أو أيام النحاس باشا

سرى للغاية

وواخذ النهارده عمل حزبي وواخذ نشاط، هل هيفضل؟ أو هل هنواجه الأمور كلها بالقوة؟!

دى العملية الحقيقة، هي دى اللي هتبين على سبتمبر هل إحنا فعلا راضخين بقى أو أقوياء؟

بعدين الحقيقة أنا مش عايز أمشي باعتقالات، أنا اعتقلت ٣ فى العملية اللي فاتت دى كلها؛ اللي هم أصلا من الشيوعيين الصينيين اللي كنت قلت لكم عليهم، واللى كانوا بيشغلوا كلية الهندسة جامعة القاهرة. هم دول اللي هم سمير حمزة، عزام، التالت مين؟

جمعة: صلاح عيسى.

عبد الناصر: صلاح عيسى. هم دول تقريبا الثلاثة بس اللي اعتقلوا.

وبعدين هل أيضا هنحل الموضوع بالاعتقال؟ والاعتقال أنا فى رأى ماهواش حل إلا إذا دعت الظروف إن احنا نعتقل عناصر رئيسية؛ بحيث إن احنا نشل نشاط هنا أو نشاط هنا.

ولكن لازم هتبص بالنسبة لمواقع كثيرة، بحيث على سبتمبر تكون باينة إن الثورة منتصرة على القوى المضادة وعلى الثورة المضادة ومشيت. دى الحالة الحقيقة اللي كنت متصورها، وده الحقيقة اللي كنت هقوله بعد ما ناقش.

صدقى: ودا اللي أنا كنت أقصده يافندم، إن احنا من القوة بحيث إن احنا بإذن الله الوضع أحسن بكثير مما تثيره هذه التحركات من بعض العناصر اللي بتجد مجالها الى الكلام فى الندوات والمؤتمرات، ولكن ما الذى تمثله من الشعب؟ ودى الصورة اللي عايز أدرسها، وما هو موقفنا اليوم؟ موقفنا

سرى للغاية

اليوم إن الجزء الأعظم من الشعب، وهى القوة العاملة الحقيقية العمال والفلاحين وغيرهم وغالبية الناس العاديين والعناصر الأخرى موجودة فعلا بتشتغل، بس مش لازم نغالى فى قدرتهم.

ودا يعنى مطلوب مزيد من العمل ومزيد من الثورية، واللى أنا أقصده إن احنا ونحن فى موقف القوة ولا بد أن نمارس هذه القوة ولا نرضخ لأنهم بيحاولوا يبينوا إن لازم نرضخ؛ دا لو حضرتك نفذت لهم طلب واحد من المطالب تانى يوم هيطلبوا مطلب تانى.

عبد الناصر: بس أنا موافقتش لهم على طلباتهم، أنا لميت الحاجات اللي بيحاولوا يكسبوا بيهم الجماهير وحطيتها فى البيان، وبعدين الحاجات دى هى فى الميثاق.

صدقى: أنا مبقولش إن سيادتك وافقت لكن خطتهم هم إن مهما عملنا لن يرضوا .

عبد الناصر: وبعدين المحكمة الدستورية، دى هى اللي أنا زودتها ومحدث جاب سيرتها، والمحكمة الدستورية دى ليها تفسيرات كثيرة قد تكون سياسية مش قضائية، ولا إيه يادكتور؟

كامل: يافندم فيه نقط موجزة جدا يعنى لو أذنت سيادتك بعرضها، الحقيقة فيما يتعلق باللجنة اللي هتشرف على الانتخابات، هى الفكرة فيها إنها مرتبطة بسيادتك ارتباط مباشر، فهى فى الواقع ينظر لها على أنها حكم لك أو عليك. ولحد دلوقتى كثير جدا من القضايا الرئيسية سيادتك سببتها لجهات مختصة، أما فيما يتعلق بهذه اللجنة بالذات فدى هتكون مرتبطة بسيادتك ارتباط مباشر؛ ولهذا اختيار الأفراد فيها هيكون منطلق إما لتأكيد الثقة وإما لاستغلالها هى فى محاولات التشكيك ومن هنا تأتى خطورة الاختيار.

سرى للغاية

وعلى هذا فالمهم فيها هو نوعية الأفراد اللى هيقع عليهم الاختيار ودا
تصورى فى هذه المسألة.. دى النقطة الأولى.

والنقطة الثانية المرتبطة بيها: إن فيما يتعلق بعندما تتناول سيادتك
هذه النقطة فى الأحاديث، ممكن جدا أن تؤكد بنماذج من البلاد الأخرى
مثلا؛ فاختيار هذه النماذج قد يمكن أن يحسن فهمه ويمكن أن يساء فهمه
أيضا، وقد يكون اختيار النموذج قد يحمل معنى سياسى معين.

عبد الناصر: وأنا هنا لما قلت إنجلترا قلت روسيا علشان.. (ضحك)

أصوات: (ضحك)

عبد الناصر: أنا فاهم يعنى كل حاجة. (ضحك)

كامل: والنقطة الثالثة: إن احنا كنا نمر فى مرحلة الطابع الغالب هو التعيين الى
حالة الطابع الغالب هو الانتخاب، زى بندول الساعة يندفع من ناحية الى
ناحية أخرى. فالمهم مش عايزين تبقى هذه الحركة مندفعة فعل ورد فعل،
ومن هنا تأتى أهمية هذه اللجنة كأنها عبارة عن صمام أمن من أول الأمر
لإستمرار فكر ثورى معين خلال تاريخ الثورة.

أنا أنظر لها من هذه الزاوية، كيف يكون الاختيار من سيادتك لأن
دول عبارة عن خميرة أو عصارة ثورية من أول الثورة لحد دلوقتى.. أنظر
لها من هذه الزاوية.

سرى للغاية

عبد الناصر: أختار لجنة من اثنين كل واحد يريح نفسه من العملية دي كلها؛ لأن هو فعلا هي هتكون النقطة اللي هيسيبوا الدنيا كلها وهيمسكوا فى فلان وعلان!

شقير: ولذلك أى تعديل فى الرقم الآن هينظر لها وتفسر تفسير يعنى.

عبد الناصر: الإعلان.. أعلنته فى المؤتمرات يعنى؟

شقير: لا يافندم هي نزلت فى الجرايد رقم ٥٠ والآن أصبح الرقم ٥٠.. لجنة من ٥٠.

عبد الناصر: أنا ماقولتش لغاية النهارده، أنا لما قلت لجنة ماقولتش كام.

كامل: لوحظ لحد النهارده إن سيادتك لن تتقيد برقم معين للجنة.

عبد الناصر: دي طريقي وهتعرف كده فى المستقبل. (ضحك)

أصوات: (ضحك)

عبد الناصر: علشان أرسى بأرسى على آخر لحظة، أفضل حاطط الموضوع فى راسى على آخر وقت، ويعتبر ده أسلم.

كامل: فيه قضيتين هما.. الأولى: هي فى أول خطاب لسيادتك أن ننتهى من مشكلة تعريف العامل والفلاح.

سرى للغاية

وشئ آخر: سؤال أو استفسار سابق لأوانه، حينما يقرر المؤتمر القومى أن تكون اللجان المتخصصة أو المجالس المتخصصة أو مستويات تنفيذية معينة، لابد أن تكون من داخل المؤتمر، هل هذا القرار يعتبر ملزما لكل الأجهزة الموجودة فى الدولة؟

عبد الناصر: اللى أنا بدى أقوله: إن احنا لازم نقود المؤتمر القومى، وإلا المؤتمر القومى ممكن يعمل حاجات كثيرة ، بل أكثر من هذا وأنا النهارده بأحسب مين اللى هيطلع فى المؤتمر القومى علشان يبقى عندى صورة للمؤتمر القومى، ومفيش مؤتمر قومى ببيجى بيطلع فيه صوت نشاذ أو أصوات نشاز، ولكن لابد أن يكون هناك قيادة زى ما عملنا فى مؤتمر قوى الشعب، ونقود ونوجه ونبذل جهد.. الى آخر هذا الكلام بحيث إن ما يفلتس.

كامل: وده اللى عايز أقوله يافندم، على الرغم من حق الانتخاب وكل حاجة بس لازم نراعى وجود القوى التى تستطيع أن تتابع سير العمل.

عبد الناصر: آه.. طبعا بالنسبة لموضوع العامل والفلاح أنا متفق معاك فى كلامك، ولكن وأنا اللى فاهمه إن الاتحاد العام لنقابات العمال ببيبحث عشان بيعت لى التعريف ماهو العامل. الحقيقة فى الانتخابات اللى فانتت عملية العامل والفلاح مادتش المعنى منها؛ يعنى فيه ناس كثير موظفين ودخلوا على أنهم فلاحين، وفيه ناس مش عمال ودخلوا على إنهم عمال! فلازم نحدد من هو العامل والفلاح، ولكن مش فى أول كلام هقوله لأن أنا مش جاهز لهذا.

سرى للغاية

جمعة: سيادتك.. أول من ذكر لفظ مراكز القوى سيادتك وبعدين خدوها وابتدوا يرددوها.

عبد الناصر: هو وسيادة القانون والتغيير.

جمعة: والحقيقة فيه مراكز جديدة موجودة النهارده، وهى مراكز الاستغلال ومراكز التشكيك؛ يعنى لو نرفع هذا الشعار ونركز فعلا ضد هذه المراكز.. يعنى كلية الطب مركز من مراكز الاستغلال، نادى القضا مركز من مراكز الاستغلال والتشكيك، بالإضافة الى الشعار اللي اترفع برضه سيادتك نرفع هذا الشعار ونخش جامد فى هذه المراكز ونكسرهما، الحقيقة آن الأوان.

عبد الناصر: ما هو ممكن نبتدى نعمل أكثر من كدا، نعمل ثورة ثقافية زى ما عمل ماوتسى تونج فى الصين - ساب دول على دول وده دبح ده - وقد نصل الى هذا. يعنى أنا جم لى العمال، وقالوا: سيينا ولا محتاج لجيش ولا حاجة وسيينا وإحنا نطلع ونتصدى للمظاهرات ونعمل ونضرب ونسوى، قلت: لأ.. ليه؟ لأن فيه هدف لازم الواحد يحققه أولاً، لازم نكسب معركة الجماهير وناخذ قوى الجماهير كلها وناخذ قوى الجماهير من هؤلاء الناس.

طبعا فيه قوى انتهازية بتمسك العصاية من الوسط، شايفاك ضعفان هتتضم للتانيين، وفيه قوى فى وقت ما اعتبرت إن النظام بيعق وجريت - وإحنا عارفينها بالاسم - وجريت وكان موقفها ما يلى.. هذه القوى الانتهازية اللي هى فى الوسط أو اللي بوشين، أول ما بتحس إنك قوى تجرى عليك وهيسيب العملية الثانية.

سرى للغاية

تفضل قوى الجماهير الطاهرة السليمة، لازم نكسيها بجانبنا ونقضى على كل العوامل الموجودة، وأنا رأيت إن المعركة دي مش سهلة وهى معركة صعبة وعايضة جهد وعمل كبير. وبعد كذا لازم نثبت إن احنا فعلا ثورة ومستمرة وموجودة هنعمل الدولة العصرية، ولكن فى نفس الوقت هذه الدولة دولة ثورية ماهياش العملية إن احنا هنسيبها، ماهم بتوع كلية الطب قالوا: عايزين أحزاب فى كلامهم.

وبعدين فيه ناس مننا اتكلموا هذا الكلام، وحاجات اتترددت فى المحكمة واترددت وبره، وبعدين فيه حاجة كمان فاهمينها بره.. فاهمين إن الوضع فى القوات المسلحة مش متماسك، متصورين هذه الناحية ودا كلام خاطئ.

كل اللي بره دول يهوهوا وبتاع، وممكن التعامل معاهم بعد شهر بعد ٦ أشهر بعد سنة ماعدا القوات المسلحة. والواحد كان ساب الدنيا دي كلها وكان متفرغ للقوات المسلحة، ووصل بى الأمر إننى كنت ساعات بالليل أطلب فوزى وأقول له: شيل ده من هنا وديه هنا، لغاية ما خلصنا من العملية فى القوات المسلحة.

لكن معنى هذا إن القوات المسلحة هتفضل فيها باستمرار عمليات، لأن فيه من ٥٢ لغاية النهارده فيه مش عشرات مئات المؤامرات اللي حصلت فى القوات المسلحة، ولكن بتتكشف على طول. فهم فاهمين إن العملية فى القوات المسلحة نتيجة الحرب اللي حصلت ماهياش solid. أول حاجة الواحد ضمنها القوات المسلحة بعد كده اتدور علشان يشوف النواحي الأخرى.

بعد ماناخذ قوى الشعب فى جانبنا ونمشى فى الخطوات دي بطريقة سليمة، بيبقى بعد كده القوى المضادة بنخلص عليها سهل جدا ونتصدى ليها بإجراءات ثورية. إذا ماقدرناش، يبقى السبيل الوحيد بقى إن

سرى للغاية

احنا نعمل ثورة ثقافية زى.. حصل فى سنة ٥٤ إيه؟ ما هو حصل تقريبا شئ بهذا الشكل، حصل فى ٥٤ إن محمد نجيب إتلم على الأحزاب وإتلم على الرجعيين وإتلم على الشيوعيين وإتلم على الكل، ووقف ويقول: إذا ده عمل كذا بقى يقول أنا أعمل جمعية تأسيسية وهعمل كذا وكذا، وبعدين إحنا بالعمال قدرنا نخلص على ده كله ونخلص على محمد نجيب.. حصل هذا الكلام.

العمال النهارده فيه محاولات طبعا للعب فيهم ولازم نواجه هذه المحاولات باستمرار، إذا دعى الأمر إن احنا نعمل ما حصل فى الصين.. فى الصين إيه؟ الجيش يعنى أنا الجيش مش هادخله فى هذه العملية لأن الجيش عنده واجب اللى هو المعركة، ولكن ممكن نواجه الثورة المضادة بالثورة من الداخل وده بيصفى ده وده بيصفى ده وبنخلص.

إذا مقدرناش نشغل ثوريا إحنا، وناخد قرارات ثورية علشان أولًا: لازم نكسب الجماهير فى جانبنا ده الموضوع الأول.

رفع الشعارات اللى إنت بتقوله النهارده ماهواش وقته أبدا.. سابق لأوانه؛ لأن النهارده الشعار هو لازم يختلف لازم لم قوى الشعب العاملة والسير نحو المعركة ولا شئ أعلى من المعركة.. وعلى هذا الأساس نقدر نلم القوى.

ثم أعدائنا فعلا كانوا من الشراسة، بحيث إنهم نجحوا الى حد فى إن كلامهم بتتناقله الناس؛ نقضى على هذا، بعد كده بننتقل الى مرحلة أخرى.

رفعت: هو الهدف من العملية التشكيك فى أى حاجة موجودة، وده هدف العناصر المضادة أساسا، وزى سيادتكم ماقلت هى بتحاول تجذب الجماهير اليها.

سرى للغاية

البعض بعد البيان، ينادى بإيه فائدة الانتخابات والاستفتاء دلوقتى؟! تقديرى لازم نوضع خطة من بعد الاستفتاء الى انعقاد المؤتمر العام. فى رأى إن هذه هتكون أصعب المراحل؛ لأن من خلال الانتخابات عناصر الثورة المضادة تقدر تلعب فى الجماهير أكثر من دلوقتى، وقيادات الاتحاد الاشتراكى دلوقتى أصبحت فعلا مجمدة.

عبد الناصر:

إمبارح أنا قرئت أحد التقارير عن الزيتون، الشيوعيين هناك لموا نفسهم وقرروا يروحوا لجنة الاتحاد الاشتراكى عشان يبينوا للناس إنهم موجودين ويفرضوا أنفسهم. وبذلوا مجهود كبير، وراحوا لقوا اللجنة مقفولة مالقوش حد هناك! (ضحك) لأنهم كانوا عايزين هيظهروا من الاتحاد الاشتراكى. وقيادات الاتحاد الاشتراكى زعلانين من الانتخابات، وفيه ناس اتحجبت وقالت: إننى اتكلمت كلام كويس عن مجلس الأمة ومتكلمتش عن الاتحاد الاشتراكى. فيه عناصر كويسة فى الاتحاد الاشتراكى وفيه عناصر سيئة، واللى زعلانين فى رأى هم اللى شايفين أن فرص النجاح بتاعتهم قليلة.

وأحنا هيبقى عندنا مايو ويونيه لغاية ٢٣ يوليو.. شهرين ونص، وأنا فكرى.. فى دماغى فيه حاجات يمكن مأنش الأوان إنى أتكلم فيها. أنا خايف جدا من حاجة الحقيقة.. خايف من ضرب الاتحاد الاشتراكى الجديد اللى هيطلع بواسطة أشخاص هتكون موجودة، وفعلا بدأت النغمة من النهارده، والنهارده صيغة قوى الشعب العاملة يقبلوها الناس كلها ماعدا عنصرين.. العنصر الرجعى والعنصر الشيوعى؛ الاثنين مش عايزين صيغة قوى الشعب العاملة، ليه بقى؟

لأن الرجعى، يمينى مش عايز حكاية عمال ولا حكاية الفلاحين ولا الميثاق، عايز أحزاب زى ماقال الجماعة بتوع كلية الطب.

سرى للغاية

والعنصر الشيوعى - وأنا رديت عليهم فى حلوان - عايزين الحزب وفاهمين إن أما هنعمل الحزب يبقى الحزب لازم يستند على الإشتراكيين الحقيقيين يبقى لازم نشترك عليها، ويعتبروا ده هدف بالنسبة لهم. أنا فى تصورى بالنسبة لبلدنا بالذات وبالنسبة لأهدافنا وأهدافنا الثورية، لازم نمشى بقوى الشعب العاملة، وممكن ناخذ من الشيوعيين ناس اللى بيقبلوا هذه الفكرة يمشوا معنا، وممكن ناخذ أيضا من اليمين اللى مش قوى مضادة ناس ونقنعهم بهذه الفكرة ونمشيهم معنا. واللى أنا خايف منه النهارده، أما آجى أعمل خطة هقول لناس تنفذها، فعابز أختار ناس وماديش فرصة للقوى المضادة النهارده سواء الشيوعية أو الرجعية إنها تضرب الاتحاد الجديد، وهيقولوا انتخابات إيه؟! ما الانتخابات هيطبخها فلان أو هيطبخها علان!

واتقال: الانتخابات هيطبخها على صبرى مثلا وهاجيب اللى يجيبه وهينجح اللى ينجحه. وأى كلام بهذا الشكل الحقيقة يضر الاتحاد الجديد خالص ويقومه على أسس واهية؛ فالعملية لازم تكون مضبوطة جدا. ولهذا أنا بقول: إن أنا هاخذ اللجنة وهاروح أقعد فى الاتحاد الاشتراكى وأكرش كل الناس من الاتحاد الاشتراكى.. ده الكلام اللى أنا بقوله بحيث مايقالش فلان.

هاطرد الأمانة وكله، وهاطلعه من الاتحاد الاشتراكى ومش هاخلى حد هناك فى الاتحاد الاشتراكى. واللجنة اللى هنتعين نتعين، وهاجيب كام واحد يشتغلوا معايا كمساعدين؛ وبهذا أقدر أمشى فى العملية وأنفذ الخطة اللى إنت متصورها، وبنقعد بهذه العملية شهر مايو ويونيو.

سرى للغاية

كامل: فيه سؤال يافندم لو سمحت، يعنى سيادتك عرضت الصورة فيما يتعلق بقيادة الاتحاد الاشتراكى، مدى نزول هذه الصورة للمحافظات أيضا لأنه لما يكون واضح يكون أحسن.

عبد الناصر: فى المحافظات مقدرش أحل الاتحاد الاشتراكى، ليه بقى؟ هو فيه طلب بحل الاتحاد الاشتراكى وهذا الطلب مغرض! لأن فى المحافظات اللى هينجح ينجح وإذا نجح عن طريق الاتحاد الاشتراكى إيه المانع؟! خلاص طالما العملية انتخابات مضمونة اللى ينجح ينجح.

وبعدين فيه إجراء لازم يتخذ، إذا كان فيه عناصر مضادة ومنحرفة لازم تفصل بالذات فى مجلس الأمة، وإلا معنى هذا لو ماعملتش الكلام ده النهارده معنى هذا إن مجلس الأمة اللى هيبجى الجديد بعد كده هيشجع العناصر.. مابقولش المعارضة الناس اللى لها رأى أبدا واللى بتتكلم واللى بنقول؛ مثلا الأخ ضيا كان من الناس اللى لهم رأى فى المجلس، وكل المجلس يعلم هذا.

لكن فيه عناصر مضادة، وأنا بقول بالذات على أحمد سعيد اللى أنا باشتبه فيه. إنه بيجتمع بناس مشبوه فيهم، ويعتبر هو بيكون كتلة من مجلس الأمة ومن خارج مجلس الأمة وبيتصل بالطلبة، وبي لعب دور كبير جدا واعتمد على اسمه فى صوت العرب.

وبعد العدوان طلب من أعضاء مجلس الأمة إنهم يقدموا استقالة جماعية، ويمكن عرفتم بهذا الكلام وباين دوره مشبوه شبيهة كبيرة جدا. وبعدين زى علوى حافظ مثلا لازم يفصل، ليه؟ فيه عناصر لازم تفصل من الاتحاد الاشتراكى، وهذا الفصل معناه فى المستقبل إن الناس اللى بينحرفوا مش هيستمرروا فى الاتحاد الاشتراكى.

سرى للغاية

كامل: لو أذنت لى يافندم تكملة للفكرة اللى فى ذهنى، أنه ممكن جدا انتهاز فرصة نوع من الفراغ السياسى الناتج من عملية الـ hanging up من قيادات الاتحاد الاشتراكى.. دا اللى أنا عايز أوصله يافندم فى الفكرة اللى فى ذهنى هو ما يحصلش فراغ. يعنى سيادتكم هتغير فى القاهرة، فإذا كانت هناك تغييرات ترى سيادتكم أن تحدث - زى ما سيادتكم مثلا أعطيت خط للسيد محسن أبو النور فيما يتعلق بالحكم المحلى - فينبغى أيضا إن الصورة فيما يتعلق بالوضع السياسى أن تكون واضحة؛ عشان مانتركش الفراغ بحيث إن منسمحش لحد إنه يقود الجماهير الى غير ما نحب ولا تحب.

عبد الناصر: أنا بدى برضه رغم الصورة اللى أنا قلتها، بدى أقول لك: القوة المضادة دى صغيرة مش كثير يعنى. مثلا الشيوعيين، أنا عندى تنظيم الشيوعيين اللى بيشتغلوا وبيتكتلوا وبيعملوا نشاط قوة صغيرة، لو كانت قوة كبيرة كنت اعتقلت.. كان لازم آخذ إجراء بالاعتقال، وأنا عندى هذه السلطة سلطة الاعتقال، لكن القوة مش كبيرة قوة صغيرة بتحاول تشتغل.

وبالنسبة للعناصر اللى فى الجامعة، أنا فى رأى أيضا إنهم يابما قوة صغيرة يابما مطعون فيها. وأنا بعتر بتوع كلية الطب دول مايساوش ٣ مليم، وإلا لو وقفوا بينكلموا كلام فى منتتهى السفالة ولكن أنا فى رأى إنهم لا يستحقوا إن الواحد ياخذ أى إجراء معاهم، ليه؟ لأن تشويههم قدام طلبتهم سهل جدا بنقول يعنى حتى للطلبة: هم دول اللى مش عايزين أطباء يطلعوا عشان هم كل واحد بيكسب ٣ آلاف جنيه! المطاعن فيهم كثيرة جدا وسهلة والواحد فى أى فرصة بيقدر.

وبتوع القضا ده موضوع لازم نواجهه وهيجى يوم لازم نواجهه، وهم لو عرفوا إن احنا مش منهارين، وهم متصورين إن احنا منهارين

سرى للغاية

وراضخين. ومتصورين إن احنا علشان مابنعقلش وما بنضريش إن احنا منهارين، ولكن طبعا فيه نظرية ماوتسى تونج وانت تبقى تقول لنا على النظرية اللي قصادها فى العالم الإسلامى. (ضحك)

أصوات: (ضحك)

كامل: هو فيه نظرية السيد حسين الشافعى والسيد كمال رفعت. (ضحك)

أصوات: (ضحك)

عبد الناصر: (ضحك) ولو أنا قلق ١٪ كنت أخذت إجراءات واعتقلت، أنا مش قلق ١٪. أنا بقول: فيه معركة سياسية، تعالى ندخل المعركة السياسية دى بس مفيش خوف.

يعنى مثلا فيه تكتل شيوعى فى دسوق لكن الاتحاد الاشتراكى فيه عناصر الحقيقة رجعية، وبعدين أنا جيت فى يوم من حوالى سنة واعتقلناهم وسيناهم قبل العدوان، وهم عبارة عن دكتور وموظف وواحد أظن فاتح محل ومجموعة ولكن نشيطين جدا، اسمه الدكتور النويجى وهم المجموعة النشطة دى كلها تطلع حوالى ٢٠ واحد.

بيشتغلوا إيه بقى؟ بيشتغلوا على جامعة الإسكندرية وفعلا مجندين طلبة فى جامعة الإسكندرية. أنا قعدت فعلا الجمعة اللي فاتت، وقلت: هل يستدعى الأمر الاعتقال؟ قلت: لأ. لكن هم مش فى الاتحاد الاشتراكى، مفصولين وطبعا هيجروا يحاولوا يألبوا الناس.. دا فى دسوق بس.

سرى للغاية

تعالى بعد كذا إمسك هنا الحنت اللى فيها نشاط شيوعى زى الزيتون، نشاطها إيه؟ شوية مجموعات للطلبة عمليات بسيطة، يعنى بقية البلد كلها مفيش حاجة.

فيه شوية نشاط يمكن بدأوا فى كفر الدوار ولكن من مجموعة انتهازيين؛ فيه واحد اسمه شعراوى من أول الثورة موجود هناك وهو يعنى برضه ماخوفش.

فحكاية الفراغ ما تخوفش، واللى احنا عايزين نعمله الحقيقة.. عايزين برضه فى هذه الفترة من هنا لحد سبتمبر لازم يكون عندنا قيادات للطلبة فى الكليات والعمال ممسوكين كويس، ونعين الناس اللى اتخرجوا، وفيه عمليات كبيرة فى المدى البعيد بتودينا للحاجات دى.

وأنا بدى أقول لك: متخافش من حكاية الفراغ فى المحافظات؛ لأن المحافظات أوضاعها إيه؟ يعنى إحنا بنقول إزالة الفوارق والعمليات التطبيقية والاستغلال وهذا الموضوع، ولكن لازالت هناك حاجات لازم نعرف بيها؛ فيه عائلات وفيه عصابات مش ممكن نخلص عليهم. ولكن مش هيكون فراغ أو إذا حصل فراغ مش هيفرق عن ما هو موجود الآن يعنى.

كامل: إسمح لى يافندم باقتراح فى هذا الموضوع، لو كان فيما يتعلق بعمليات التوعية اللى بنمارسها حسب عملنا فى الوزارات يبقى موجود برضه صورة للحالة الفكرية الموجودة فى كل محافظة من المحافظات دول. موضوع زى موضوع دسوق، وأنا رايح منطقة هناك لو كان قبل ما أروح هناك عندى فكرة عن إيه القوى الموجودة هناك؛ أقصد نرتب كلنا مع بعض حتى يبقى فيه تنسيق وتركيز فى الخطب والتوعية، ونبقى عارفين إيه المشاكل أو المشكلات اللى قدامهم ونقابلها ونحاول ندرسها.

سرى للغاية

عبد الناصر: اتصل بشعراوى.

الشافعى: برضه موضوع الإجراءات التى قد تتخذ لا توازى وزن الشخص نفسه، الشعراوى ده جه فى انتخابات الاتحاد الاشتراكى، وأبعد فى عملية الانتخاب؛ هو طول عمره له وضعه وشعبيته، وهذه الإجراءات قد تساعد على التكتل حواليه.

مرزبان: فيه بعض الشيوعيين الموجودين الآن فى مؤسسة السلع الغذائية، اللى فرضوا على المؤسسة ولهم نشاط بين العمال، وأصبح هناك خلاف شديد بين العمال والإدارة.

عبد الناصر: فرضوا على المؤسسة؟

مرزبان: أيوه.. والتخوف من إنهم يثيروا العمال.

عبد الناصر: لا مش بالشكل ده أنا الصورة اللى عندى مش بالشكل ده، هم بس عند ثروت عكاشة. وأنا بقول: دلوقتى أنا عندى ياكوان شيوعى ياإخوان مسلمين ياوفدى ياكذا ياكذا، طيب مش ممكن آخذ السيد مرعى على إنه.. كنت إيه سعدى؟ (ضحك)

يعنى بنحاول الحقيقة نلم كل الناس!

دلوقتى الشيوعيين أنا كان لى هدف إنهم يحلوا الحزب، وتم هذا. طيب هانفضل كانوا معتقلين ومابيشتغلوش.. كان فيه ١٠٠٠ معتقل منهم فى وقت من الأوقات، دلوقتى طلوعوا من المعتقل ده اشتغل هنا وده اشتغل وده اشتغل هنا. الحقيقة العناصر اللى بتشتغل النهارده هى عناصر جديدة

سرى للغاية

غير الناس دول، يعنى إيه؟ يعنى زى ما قلت لكم: نمسك أمين العالم قد يكون تفكيره ماركسى بس أنا مبقولش عليه شيوعى، ليه؟ لأنه مش موجود فى تنظيم شيوعى.. الشيوعى هو الموجود فى تنظيم شيوعى وبيشتغل فى وسط الناس. نمسك عبد العظيم أنيس، وهو بيشتغل معنا بل بالعكس هو كان موجود فى وزارة الخزانة ولاّ فين معرفش.

صوت: الخزانة.

عبد الناصر: فى ٥٦ وقف موقف كويس جدا فى لندن، رغم إن بعد كده وقف فى موقف وحش برضه واعتقل. وبعدين هؤلاء الناس، أنا بعتبر إنه تفكيرهم يسارى ولكن ماهماش فى منظمات شيوعية ولا بيثيروا الناس. ولو واحد فيهم عمل حركة واحدة ببيان على طول ولازم يتعرف؛ لأن طبعا أى واحد ليه نشاط بيتتبعوه ويشوفوا اتصالاته إيه.. العملية برضه عملية بسيطة. حكاية إن الشيوعيين فى المؤسسات والشركات، أنا رأيت بقى إن رؤساء مجلس الإدارة اللي عندهم مشاكل هيقولوا لك: دول شيوعيين ودول عاملين..

برضه الفصل يجب أن يكون له حد ومعاملة الناس لازم نعامل الناس كناس، لكن علشان أى حد يتكلم يقول: لأ.. ده شيوعى وده مش عارف إيه وإيه.. ده كلام لا يؤخذ أبدا على علته. وأنا رأيت إنه حاول يخمك فى هذا! (ضحك)

مرزيان: الحقيقة فيه حوالى ٧٠٠ طلب تظلم ومحدث سأل فيهم.

سرى للغاية

عبد الناصر: الحقيقه أنا بعتبر أن تلك العملية المكتبية هي السبب. وأنا بعتبر إن أى واحد شيوعى عند شعراوى دوسيه عنه ومعروف ١٠٠٪.

يجب إن الإدارة الحقيقه أيضا تشتغل سياسى؛ لأن ما هو إحنا بنقول إحنا مش هنعتقل ومش هنضرب ناس بيبقى إذا نعمل عمل سياسى. وبعدين برضه بدى أقول فى الاجتماعات بلاش الاجتماعات الكبيرة فى هذا الوقت، ليه؟ وأنا كان بدى الحقيقه أقول هذا الكلام ليه؟ لأن برضه زى ما بقول لكم: نفوس الناس معبأة، وفيه مشاكل إحنا عاملينها والإداره عاملاها والحكومة عاملاها، فأى اجتماع كبير يطلع واحد ممكن يبوظ الاجتماع. لكن لو أتعملت اجتماعات صغيرة، يعنى مثلا فى كلية الهندسة لما اتعملت الاجتماعات على مستوى الأقسام ابتدأت العملية نقل؛ لأن على طول اللي مهيجيين فى أى مكان قد إيه؟ هو اثنين أو ثلاثة، دول بقى لا هم شيوعيين ولا رجعيين لا هم أخوان مسلمين ولا هم حاجة أبدا، بالعكس ده هم ناس مهيجيين.

عكاشة: إذا سمحت لى يافندم أوضح شئ للسادة الزملاء لتصورهم أن وزارة الثقافة متكرشه بعدد كبير.. (ضحك)

عبد الناصر: (ضحك)

أصوات: (ضحك)

عكاشة: عندنا ٤ فقط، وسيادتك على علم وعلى رضا بالوضع ده.. وهم: الدكتور عبد الرازق حسن فى السينما، وحسن فؤاد فنان، سعد كامل فى الثقافة الجماهيرية، والدكتور عبد العظيم أنيس، وكان الأستاذ أمين العالم وراح

سرى للغاية

بعد كده دار أخبار اليوم؛ ففيه فى العدد الكبير فى وزارة الثقافة مفيش إلا هذا العدد، علشان بعض السادة مايفتكروش إن وزارة الثقافة خلية شيوعية!

عبد الناصر: نسيت الشرقاوى!

عكاشة: ده موجود فى الأصل يافندم. (ضحك)

عبد الناصر: (ضحك)

أصوات: (ضحك)

عبد الناصر: الشرقاوى مالوش نشاط شيوعى يعنى؟!!

عكاشة: وإذا كان فيه أى حد له نشاط، السيد وزير الداخلية خطرته فى الحال علشان نقدر نوقف.

النقطة الثانية: بالنسبة للمؤتمرات اللى سيادتك وجهتنا إن احنا نعملها: أنا معنديش شئ أضيفه لأن كل شئ عند سيادتك وتقريبا كل حاجة بتتكرر، لكن الظاهره اللى موجودة عندى فى الواقع إن بتتحول هذه المؤتمرات الى مطالب شخصية وتظلمات، فمن المصلحة فعلا أن ننقل الى الأقسام القطاعات ونحاول نحل مشاكل. شكرا.

عبد الناصر: هو وقف عبد المنعم الصاوى فى المؤتمر، وقال: إن لازم قبل ما تتاخذ القرارات تعرض علينا وعلى القواعد الجماهيرية وبتاع. فالناس مسكوا فى

سرى للغاية

رقيبته وقالوا له: طيب وإنّ ما بتعملش هذا الكلام فى الوزارة، فلانم تعمل هذا الكلام فى الوزارة قبل ما تقول لنا يعنى.

حتى نفس طريقة التوعية وخط التوعية يجب أنه يكون.. مفيش حد فى الدنيا مثلا بيعلن قبل ما بياخد قرارات ياخذ رأى الناس فيها إلا إذا عملنا استفتاء، إلا هنعمل لجنة المركزية ناخذ رأى اللجنة المركزية مثلا، فى هذا نفس طرق التوعية يجب أن تكون سليمة.

عكاشة: بس يعنى أنا عايز أعرف توجيه سيادتك مش واضح يافندم، لو تكرمتم.

عبد الناصر: لا يعنى لم إنتوا تقولوا عملتوا توعية فى الوزارة، يروح وكيل الوزارة يقول للناس: لازم القرارات اللي تاخدها الدولة وتتخذ تنزل الاتحاد الاشتراكى، ويتاخذ موافقتنا عليها وشئ من هذا القبيل!

عكاشة: ده يافندم حصل بعد ما سيادتك ألقيت البيان.

عبد الناصر: لا.. قبل البيان، المؤتمرات اللي إنت طلبتها.

عكاشة: مكنتش موجود فيها يافندم.

عبد الناصر: لا.. مكنتش موجود، كان موجود عبد المنعم الصاوى هو اللي كان رئيس الاجتماع.

مراد: فكرت فى عدد اللجنة اللي هاتشرف على الانتخابات، وقلت: برضه يجب أن يكون العدد له منطق ومايكونش تحكى، ولو قلنا إن عدد المحافظات

سرى للغاية

يكون فيه ٢ من كل محافظة يشرفوا عليها ويبقوا فى اللجنة، وبالتالي يكون هناك أساس منطقى للعدد.

عبد الناصر: هو هنا المنطق مش هى الأمانة العامة هى اللى هاتشرف، هو ده المنطق الأساسى اللى وضع على أساس هذا الموضوع.

مراد: ما ذكرته سيادتك عن العام القادم والصعوبة اللى هتواجهنا، لازم إحنا نبدأ من الآن فى العمل، ولا نتقاعس مستثنين على أن هناك إجراءات ستتخذ عند الضرورة. لكن فى أعمالنا وقراراتنا يجب أن تكون وسيلة لتهيئة الجو العام ومنع العناصر المضادة من إنها تعمل مشاكل.

مثلا فى الجامعة، لازم يكون هناك تخطيط من الآن وحتى سبتمبر القادم. وده بيقودنى الى موضوع المؤتمرات اللى سيادتك أشرت اليها، أنا شايف الناس دلوقتى والمؤتمرات اللى بتعقد وحتى إعلانات الصحف والشوارع عن البيان، بدون الدخول فى مناقشات تفصيلية لنقاط البيان.. هذه العملية سيئة للغاية!

وسيادتك حتى ضربت مثل بعد المعركة، بمنع رسم صورة سيادتك وإسمك فى الاعلانات الخاصة بالقطاع العام، وكان لها رد فعل جميل جدا فى نفوس الناس.

وأرى بتوجيه من سيادتك بخصوص الإعلانات من شركات القطاع العام، أن تكون مقتصرة فقط على مشروعاتها ومنتجاتها حرصا على المال العام وعدم إثارة أى شبهة لاستغلال المال العام.

عبد الناصر: ده كلام عايز تقوله للجرايد؟! أنا متهيألى إنتم هنا تدوا تعليمات لوزاراتكم ومفيش داعى يطلع من هنا.

سرى للغاية

مراد: النهارده مثلا صورة سيئة عن شركة مصانع النحاس وراسمين صورة الاجتماعات وكاتيين، قال رئيس الشركة كذا، وده كله بفلوس.

عبد الناصر: زى المقالة بتاعتك دى بفلوس ولاّ! (ضحك) هو برضه الدكتور مراد له حق فى هذا لأن اللى حصل طبعا كلام عن هذه الإعلانات، بل قيل إن يوم ما أنا قلت بيان ٣٠ مارس فى الجرايد اللى طلع فيها البيان، طلع فيها تأييد للبيان!

فى الوزارات بتدوا بكره توجيه كل وزارة، إن بيوقفوا عملية الإعلانات، ولو إن أنا الحقيقة مارضيتش أتدخل لسبب؛ يعنى أنا فكرت الجرايد إحنا مابنديهاش إعانات، يعنى الجرايد بتصرف على نفسها ومفيش إعانات. وأنا قايل لهم الجريدة اللى هتخسر هاقلها، لأن ماحناش مستعدين ندى إعانات. الجمهورية الأولى أخذت إعانات كثيرة جدا لغاية ما جه يوم من الأيام أنا قلت لهم: بعد كده مفيش إعانات، ياتقفوا على رجليكم يالجورنال يتقفل.

ويعتبر برضه روز اليوسف فيها مشاكل مالية، فى الوقت الحالى ماحناش عايزين ندى إعانات من الدولة للجرايد. إذا لايد إن يبقى فيه إعلانات؛ لأن هو الجورنال نفسه بيخسر ثمن الورق اللى بينزل أكثر من ثمن الجورنال، فلازم الحقيقة الإعلانات.

مراد: نعم يافندم، بعيد عن الأغراض السياسية التعريف بمنتجات الشركة.

عبد الناصر: والجمعيات التعاونية أيضا.

سرى للغاية

مراد: وبعدين فيه الموضوع اللي عرضه السيد نائب الرئيس على سيادتك الصبح الخاص بالقوى العاملة، لأنه مسألة هامة وأستاذن سيادتك النظر فيه.

عبد الناصر: بنشوفه.

وأنا بيهمنى طبعاً أسمع أى نقط. هو فيه نقطتين بدى أقولهم: بطلوا إنتم مؤتمرات لأننى هابتدى أتكلم يوم الخميس الجاى. هتكلم الخميس الجاى والخميس اللي بعده.. هتكلم ٣ أو ٤ مرات وعلى هذا الأساس بيقوا إنتم تقدرنا تبطلوا مؤتمرات أو تقللواها.

النقطة الثانية: حد فيكم شايف نتيجة مؤتمراتكم نقط تستدعى منى أنا فى كلامى أفسرها غير العامل والفلاح؟ أنا خدت نقطة العامل والفلاح ونقطة اللجنة.

شقىر: هى نقطة الهدف من الاستفتاء يافندم وهى تماسك الجبهة الداخلية؛ وبهذا الشكل بنعزل كل اللي بيهاجموا الاستفتاء.

أبو النور: فكرة بقاء الاتحاد الاشتراكى أثناء الانتخابات.

عبد الناصر: هو الموضوع ينتهى أيضا يوم الاستفتاء.

شقىر: موضوع الدستور الدائم الذى جاء فى البيان، يحاول البعض التشكيك فى الدستور القائم.

جمعة: سيادتك تذكر برضه الاتحاد الاشتراكى، وإن فيه أعمال تمت.

سرى للغاية

عبد الناصر: الكلمة الطيبة يعنى! (ضحك) دلوقتى المسيحيين حد فيهم هينجح فى المؤتمر؟ هو دلوقتى الواحد متصور إن ممكن يطلع المؤتمر ومفيش فيه ولا واحد مسيحي.

الشافعى: ممكن يحصل أن يتم الترشيح فى المناطق اللى فيها مسيحيين.

صوت: ممكن تطبيق ماحدث فى مجلس الأمة.. التعيين.

عبد الناصر: هو أنا عينت معاهم مسلمين علشان مايبانش الموضوع طائفية.

المهندس: هو موضوع الاشتراكات، والبعض يحاول أن يتحلل من دفع الاشتراكات.

عبد الناصر: إيه رأيك يا أخ ضيا؟

داوود: إحنا بنقدر نقسط، ناخذ جزء والباقي على ٤ سنين.

غانم: بالأمس كان هناك اجتماع مع أساتذة كلية الحقوق ويسألوا.. هل الضمانات الخاصة بالحريات والقضاء وغيره الواردة فى الباب الثانى من الدستور، مرجأة لعمل الدستور الدائم؟ طبعا قلت لهم: لأ. لأن هذه الضمانات موجودة فى الدستور والميثاق، وإنما كانت هناك محاولة تشكيك فى النقطة دى.

هناك بعض المناطق التى لم نقم فيها بعمل سياسى مثل القضاء، وبرضه فى الجامعات هناك كليات فيها عمل سياسى أحسن من كليات.

سرى للغاية

نقطة أخيرة: العمل اللى نبذله لاجتذاب الجماهير، لأننى حسيت برضه فى الاجتماعات إن عندهم ثقة فى سيادتك وفى البرنامج. وباشوف إنه يوجه أيضا للبلاد العربية، لأنى حسيت إن البرنامج له محل مناقشات كبيرة فى البلاد العربية، ونحن نحتاج الى ثقة أيضا فى العالم العربى لأسباب سياسية واقتصادية.

عبد الناصر: هو فى العالم العربى أعداءنا هم أعداءنا وأصدقائنا هم أصدقائنا، ماحصلش تغيير يعنى.

رياض: الكلام اللى بيقوله الدكتور غانم هام جدا.

ف. فوزى: الخطوات اللى تمت كلها سلمية، وأنا شايف إن هناك قوى مضادة ستظل تقوى مراكزها فى الداخل.

عبد الناصر: هو كلامك معقول، بس هو أنا رأبى أنا طبعا عامل خطه فى راسى أنا رأبى إن احنا ندخل معركة سياسية لجذب الجماهير، بعدين القوة الانتهازية بعد كذا هتختفى. القوة المضادة بعد كذا، لازم يانقدر ناخذ إجراءات بالنسبة ليها أصل سهل أوى.. أنا أقدر أنذر واستمر فى الانذار. وهم عارفين طبعا لأن أنا بشوف الكلام اللى بيتقال، وأظن إنهم متصورين يعنى كل الناس إنى أنا باقعد ساعتين كل ليلة أقرأ.. ده قال كذا حصل فى الاجتماع ده كذا وكل الاجتماعات اللى روحتها بيحى لى مكتوب وبشوف إيه الاجتماعات، واللى إنتم ماروحتوهوش؟

ف. فوزى: مانعرفوش.

سرى للغاية

عبد الناصر: مش عارفين؟

ف. فوزى: لا.. القوى المعادية.

عبد الناصر: أمال أنا قاعد ١٦ سنة باعمل إيه؟!

ف. فوزى: القوى المعادية. هم فيه ناس ظهرت جديد، ومعتقدين بإنهم نجحوا فبيعزوا مواقعهم.

عبد الناصر: هو أنا متهيألى الكلام ده بعد..

ف. فوزى: الاستفتاء ٢٣ يوليو.

عبد الناصر: لا.. بعد تكوين اللجنة المركزية.

صوت: آه.

عبد الناصر: بعد ما يخلص المؤتمر وبعد تكوين اللجنة المركزية، ممكن فى اجتماعات المؤتمر بيحصل الكلام اللى ممكن فيها، مش عاوزين ييجى المؤتمر القومى زى المؤتمر اللى عمله مرزبان النهارده؛ نبص نلاقيه انقلب ضد الادارة والدولة والثورة ونظام الحكم، ولكن هنوصل لهذه المرحلة.

مراد: طالما بتكلم عن حرية إبداء الرأى والحريات، أنا بقول: إن لازم نراعى حدود القانون، إن أى خروج عن القانون فى هذا الوقت يعتبر خيانة للبلاد

سرى للغاية

وإن أى تفرقة أو إثارة فتن تعتبر ضارة بالمرحلة الحاضرة؛ يعنى مش بمعنى التأديب باستعمال العنف، إنما تحذير بمعنى إن أى خروج عن القانون أو إثارة فتن فى الظروف الحالية والعدو موجود هى تعتبر عملية فيها خيانه وطنية.

ويقول: حتى حرية الصحافة، لأن دلوقتى فيه حرب والحرب فى أى دولة من الدول الديمقراطية بتفرض بعض من القيود على الصحافة.. الى آخره؛ يعنى يمكن علشان متبقاش المسألة حرية على إطلاقها يعنى بيتدى مثلا يثير الناس، وبرضه هى عملية عاوزة نوع من لفت النظر البسيط يعنى فى القانون وبسيادة القانون.

عبد الناصر: عملوا منشورات وودوهم للقضاء فسابهم فى نفس اليوم! تعرف قال إيه؟ قال: إيه يعنى.. كلنا بنقول كذا! يعنى إنت بتتكلم عن القضاء، إذا كنت إنت بتتكلم عن سيادة القانون وهنتكلم عن سيادة القانون لازم الحقيقه ننظر للقاضى، مين اللى هينفذ سياسة القانون أعداؤنا ولأ ناس يمثلوا المجتمع أو أعداء المجتمع؟! ده السبب إن أنا اتكلمت فى هذا الموضوع، وإلا هنضطر نمشى أحكام عرفية. أيام صدقى مكانش فيه أحكام عرفية، وأنا قرريت قانون العقوبات كله وفيه أحكام لحد دلوقتى موجودة من أيام صدقى، ويقول لك: لو اجتمع خمس أفراد أو كذا أو كذا أو غيرهم.

مراد: قانون التجمهر.

عبد الناصر: إيه؟

مراد: قانون التجمهر.

سرى للغاية

عبد الناصر:

مش فاهم لو نشر كذا أو كذا أو كذا أو غيره، ولو عمل بكذا أو كذا أو كذا أو غيره! يعنى لو اتمسك واحد فى الشارع وتودى على البتاع دى لازم يتحكم عليه. ولكن إذا كان الحقيقة القضاء معادى للثورة وواحد وضع سياسى فللازم يكون لينا وضع من هذا القضاء.. ده الكلام اللى أنا بقوله. ويقول: إن ده من هنا الى سبتمبر بيبقى يعنى لازم نبحت هذه الموضوعات، ويكون لينا أوضاع ثورية. ما هو ليه احنا عملنا محاكم كذا ومحاكم كذا؟ لأن فعلا مكانش فيه ثقة.. ده السبب. يعنى هل ممكن إن احنا فعلا نتلافى هذا؟ ياريت وفى جلسة جاية بيبقى أبو نصير يكلمنا عن اللى شايه فى القضاء.

الرد على هذا، أنا ماجيش قبل الاستفتاء أهدد ليه؟ اللى يهدد ده أولاً: اللى بيكون شايف إن الأمور وصلت الى حد التهديد، أنا بقول لك: أنا مش شايف إن الأمور وصلت الى حد التهديد. وأنا اتكلمت لما جيت عندكم قلت: إن احنا الثورة المضادة إحنا هنسحبها، وبعدين أما تكلمنى فى هذا الموضوع فى رأى منتكلمش فيه.. أنا بالذات ما اتكلمش فيه ممكن الدكتور مراد يتكلم.

موضوع الحرية أصله موضوع مالهوش أول ولا آخر، ليه؟ لأن الحرية بدأت منذ بدء الإنسانية لحد دلوقتى، إيه الحرية بقى فى هذا، إيه؟ الصحافة، اللى عاوز يعمل جرنال يعمل جرنال النهارده عاوز مليون جنيه.. علشان يعمل جرنال مليون جنيه على الأقل علشان يقدر يعمل جرنال، مين اللى هيقدم المليون جنيه للى عنده المليون جنيه؟ وهينشر إيه اللى عنده المليون جنيه ده.. هينشر إيه؟ هينشر مايتماشى مع مصالح صاحب المليون جنيه.. فهى العملية نسبية. طيب ماهو بيقولك: الحكومة ومتسيطرش على مجلس الأمة، إذا مكانتش الحكومة تسيطر على مجلس الأمة لازم تروح تانى يوم! (ضحك)

سرى للغاية

يعنى الحكومة والسلطة التنفيذية، إذا ماكانتس الحكومة تسيطر على مجلس الأمة تانى يوم لن تكون حكومة! فبصرف النظر عن الفصل بين السلطات والكلام اللى بيتقال ده، مفيش حاجة اسمها فصل بين السلطات اللى هى السلطة التنفيذية والسلطة التشريعية، هى إذا كانت السلطة التنفيذية ليس لها سيطرة على السلطة التشريعية لن تكون فى اليوم التالى سلطة تنفيذية؛ معنى أن لها سيطرة إن الأغلبية معاها وتضمن لها البقاء.

هذا لا يمنع حرية الرأى، لكن قدامنا حلين.. ياالحكومة مالهاش سيطرة على السلطة التشريعية والسلطة التنفيذية تمشيها، ياالحكومة تحل السلطة التشريعية.

ده موضوع الحريات يعنى كل واحد حر إنه يموت نفسه، لكن معروف اللى هيموت نفسه هيعاقب فى الآخرة.. يعنى كل حرية لها حدود وخارج هذه الحدود لها عقاب.

ف. فوزى: أنا بس كان قصدى فيه بعض الناس بياخدوا خبر إن سيادتك عارف الدولة عارفة.. زيادة الاتصالات، ييجى أحمد سعيد بالطريق البلدى ويروح لنسايب ضابط طيار أول زيارة، تانى زيارة عاوز يشوفه!

عبد الناصر: عاوز إيه؟

ف. فوزى: عاوز يشوفه، الشغل إياه يمكن شى من التبصر بيتم ببعض الناس دول وبيتدوا مش يوسعوا نشاطهم بهذا الشكل.

سرى للغاية

عبد الناصر: طيب ما أنا بعتبر إن فيه ناس يجب فصلهم علشان يتعرف موقفهم، وبالذات إديت مثل بأحمد سعيد لما يتعرف إنه فصل من الاتحاد الاشتراكى.

سليمان: يعنى كان فيه اجتماع هناك فى الخليفة ومقدرش يروح يعنى مع إنها حنته! بيتعرفوا الناس دول.

شقيير: هو فيه مجموعة اتوضعت تحت الحراسات لم يطبق عليها قانون العزل وبعدين رفعت الحراسة من عليهم؛ دول واخدين موقف معادى، دول موجودين داخل الاتحاد الاشتراكى، ويبدو لى دول عاوزين قرار عزل زى الموضوع بتاع أحمد سعيد.

داوود: لو أذنت لى يافندم.. يمكن بدل ما نعمل تحذير تبصر قوى الشعب العاملة بحيث أنها تدقق فى اختيار ممثليها؛ حتى لا ينفذ للمؤتمر ممثلين بيتستروا بثوريتهن وبانتمائهم لقوى الشعب العاملة، فتبقى مسألة تبصير بدل من التحذير للقوى المضادة.

كامل: هو فيه نقطة، فيه تأييد مطلق للبيان وما ورد فيه من أهداف وفيه إجماع على هذا، إنما يمكن القوى المضادة تلف من طريق تانى وأن تثير الشك فى ضمان التنفيذ، ونقول: ما هو ضمان التنفيذ؟ إذا كان الاستفتاء موجود فيه أو سيادتك تشير الى إجراءات التنفيذ، سواء الأجهزة التنفيذية فى الوزارات يبقى فيه عملية متابعة. يعنى ده يمكن من التساؤلات، مش بيطلعنوا فى المبادئ فى حد ذاتها ولكن ضمان التنفيذ.

سرى للغاية

عبد الناصر: بس ده فى الحقيقة ضعيف اللى ببيجى فى الآخر ويقول لك: إن إيه الضمان.. الضمان هم يعنى.

كامل: هذه النقطة عادة بتيجى فى خطابات سيادتك، ولكن أعتقد إن الوقت الحالى برضه محتاج منا تأكيد أكثر، والمتعلقة بدور الشعب فى هذه المرحلة وإنه الحافظ الأمين لهذه الثورة. إن التطبيق الأول فى المرحلة المقبلة فى الاستفتاء أولاً وبعد ذلك فى اختيار ممثليهم، إنما هى مهمة فيها الجانب السياسى كما أن فيها الجانب الأخلاقى أيضاً؛ يالما أنها شهادة حق أو شهادة زور، وإن المسألة يجب أن نعرف نوعية من نختار علشان متطلبات المرحلة اللى احنا مقبلين عليها.. دى النقطة الأولى.

والنقطة الثانية: برضه لو أذنت سيادتك.. عاوزين من سيادتك كلمة تقدير لمن تقدم بالعون لنا فى هذه النكسة على مستوى خارج الجمهورية.. يعنى كلمه تقدير وشكر لهم.
والنقطة الثالثة: لو تعرضت سيادتك..

عبد الناصر: هقول الاتحاد السوفيتى. (ضحك)

كامل: مافيهاش حاجة. (ضحك)

عبد الناصر: (ضحك)

كامل: وعاوزين نقول كلمة متعلقة بالدكتور ثروت عكاشة، إن هم محولين لنا سيناريو عن الإسلام وتعاون به الأوقاف وزارة الثقافة، واللى محوله عبد الرزاق حسن يعنى! (ضحك)

سرى للغاية

عبد الناصر: لازم تراجعه كويس يعنى. (ضحك)

أصوات: (ضحك)

كامل: بالاضافة عن سيناريو عاملينه عن الأزهر وتاريخه، فالسيناريوهين لعبد الرزاق حسن برضه! (ضحك) وبرضه يافندم، نقطة أثاروها بعض زملائنا وتداولها بعض الناس، أن الميثاق كان موجود وبيان ٣٠ مارس موجود وكنا بنقول كل مرة أن الشعب هو الحافظ لهذه الثورة، ولكن ماهو الضمان لعدم تكون مراكز قوى جديدة؟ لأنهم أحسوا من كلمات سيادتكم وسيادتكم صرحت بهذا أن فى الفترة السابقة لم يكن سيادتكم مطلق اليد فى التصرف فى العمل، وأن هذه المراكز كان لها من القدرة ما تستطيع أن تحول به بين ماهو فى ذهنك وما تريد أن تراه مطبقا فى هذا المجتمع.

العملية دى عندهم عاوزة تتحل، إزاي برضه؟ لو أقول لهم مثلا إن أنتم الضمان، برضه الكلام بيحتاج الى شى من التوضيح شوية. ده بهدف، ولكن هل نستطيع إن احنا نفكر فى بعض خطوط عملية؟ وفى ذهنى أن نعمل خطة توعية شاملة لمتطلبات المرحلة، بحيث تساهم فيها كل الأجهزة المعنية بالكلمة والفعل فى المجتمع كله، ونقسم علينا ثم توزع علينا كل فى قطاعاته. والمسألة دى تتم فى المسألة التنفيذية والاتحاد الاشتراكى بشكل جديد، وتكون من المهمات الأساسية إن لم تكن المهمة الأساسية له.

صيانة فكرية لهؤلاء الناس، لأن ممكن جدا إننى أسيب هذا الشاب فى مجالات التيه ويخطئ وبعدين أحاسبه، ممكن جدا إن أنا عاوز له طب وقائى؛ فإحنا عاوزين نخلينا فى مرحلة الوقاية قبل ما نوصل لمرحلة العلاج.

سرى للغاية

النقطة الأخيرة اللى عاوز لو تفضلت سيادتك بالكلام فيها: وهى إن احنا برضه الى جانب ما نتكلم عن السلبيات الموجودة أن نوكد الإيجابيات التى تمت فى المجتمع، وخصوصا ما يتصل بدور الشعب للحفاظ على هذه الثورة وإعطائها دفعة الاستمرار.

مراد: بخصوص موضوع أحمد سعيد والقضاء، هل تأذن سيادتك للسماح لأى واحد منا بالاتصال بأحد من هؤلاء الأشخاص، أن يحاول عن طريق هذا الاتصال الى أن يبصره لخطورة ما هو يمارسه من تحركات!؟

عبد الناصر: لا.. بالنسبة لأحمد سعيد معرفش يمكن أنا بقرا وبشوف، الأخ ضيا يقول لنا إيه اللى شايفه.

داوود: لا مفيش هو واخذ خط واضح.

عبد الناصر: هو عامل كتلة.

داوود: كتلة وبيتصل سواء داخل المجلس أو خارج المجلس.. يعنى له نشاط خارج المجلس أيضا.. الاتصالات.

عبد الناصر: وأنا رأيى إن له اتصالات بحد أجنبى، لأن أنا عندى أسماء ناس بيجتمع بيهم وهم على صلة بالكويت والسعودية، ومن المعروف عنهم إنهم بياخدوا فلوس ويبسلموا فلوس وناس بالذات أسماءهم. وطبعاً هو أخذ مكتب أظن فى عمارة وهبة.. يعنى اللى واخذ مكتب فى عمارة وهبة..

سرى للغاية

شفت كلامه مع بعض الناس وكلامه بيقول إيه؟ بيقول إن احنا يجب أن نهد كل الناس اللي حوالين جمال عبد الناصر ولا نتعرض لجمال عبد الناصر - دى أول كلمة بيقولها - وبالذات طبقة العسكريين. وبعدين طبعا معنى هذا إيه؟ يعنى إذا كان هيهد كل الناس اللي مع جمال عبد الناصر يبقى هو الهدف! وفى نفس الوقت مثلا بيحاول يتصل بالناس اللي عندى فى المكتب.

وبعدين بقى بيتصل بطلبة فى الجامعة، ويقول لهم: إعملوا تنظيمات ولازم تثيروا وتعملوا مظاهرات. وبعدين اتصل بأعضاء مجلس الأمة، وقال: لازم نقدم استقالة جماعية ونعمل كذا وشئ من هذا القبيل، وبعدين عامل كتلة جوه المجلس، وكلامه كله فمفيش داعى نحسبه علينا أبدا بالنسبة لأحمد سعيد وغلانم اللي معاه ده اسمه..

داوود: محمود غلام.

عبد الناصر: محمود غلام. كام واحد بهذا الشكل الحقيقة لازم يكون لينا موقف، ولازم أسقطه فى الحتة اللي بينزل فيها بدون تزوير يعنى أو بدون حاجة.. بالتوعية والكلام ده؛ ففى رأى بالذات فيه ناس موجودين فى مجلس الأمة وهم محسوبين على الاتحاد الاشتراكى. ويقول فيه التزام أيضا، فيه حاجة إسمها إلزام، لا تلزم أى واحد بأى شئ أبدا ولكن يجب أن يكون كل واحد ملتزم بالولاء للثورة وملتزم بالميثاق، ويوقف يتكلم ويعارض زى ما هو عاوز.

يعنى الأخ ضياء جه من المجلس مكانش مؤيد لنا فى المجلس.. الكلام اللي اتقدم للحكومة مكانش مؤيد ١٠٠٪، أبدا وقف وعارض وعمل،

سرى للغاية

وأنا مكننش أعرفه ويرضه كنت باسم عليه وبأسمعه فى بعض الجلسات. باسم الجلسات المهمة.. عامل خط وباسم الجلسات المهمة لمجلس الأمة الواحد بيقد يسمع التون بتاع ده وبتاع ده، والواحد مش بيحكم على الناس بإنه معارض أو موافق على الكلام؛ لأن كل واحد لازم يكون له رأى.

لكن اللى بيعمل دسائس وبيعلم كتلة.. يعنى مثلا لما وقف واتكلم عن قضية الطيران وقال: إن هذه الأحكام إزاي ماتصدقش عليها والناس خرجوا وبتاع. مثلا أنا سمعت الجلسة دى، علما إن قانون الأحكام العسكرية طبق تطبيق كامل، لكن هو سئ جدا ومعاه الوكيل بتاعك كمان الوكيل اللى عندك اللى فى وزارتك.

داوود: أنور أحمد.

عبد الناصر: أنور أحمد.

سليمان: واستغل أجهزة الشؤون فى بعض الدعاية فى الخليفة.

عبد الناصر: لا.. أنور أحمد سئ جدا يعنى ومنضم الى أحمد سعيد، هذا لو كنا نمشيه

ممكن يكون أحسن يعنى؛ لأنه هو بيجمع بأحمد سعيد وبيجتمعوا بناس أجنب برضه أنور أحمد ده، وبيتكلموا وبيقولوا خطط بهذا الشكل.

إذا كان حد بيعرف حد وبيتصل بيه أنا طبعا معنديش مانع.

النقطة الثانية: هو أنا كنت عاوز رياض يدينا فى عشر دقائق

على الأكثر يعنى التطورات الأخيرة من كلام اللى قلناه الجلسة اللى فانت لغاية النهارده بالنسبة للموضوع بتاع اسرائيل.

سرى للغاية

رياض: الجلسة الماضية إحنا..

عبد الناصر: اتكلمنا عن الملك حسين.

رياض: آخر مقابلة ليارنج.

عبد الناصر: عاوزك تقول بالذات الحاجتين.. كلام يارنج فى الأردن ورسالة الأمريكان للملك فيصل.

رياض: على أى حال هو المشكل بالحقيقة باختصار هو مشكل أمريكانى -

أردنى، الأمريكان شعروا إن اسرائيل فى كورنر وهم باعتبارهم بيؤيدوا اسرائيل شعروا إنهم فى مركز ضعيف. طالما إن احنا بنوافق على تنفيذ القرار واسرائيل بتفرض تنفيذ القرار، فكان لازم يلاقوا طريقة إنهم يخلقوا جو فى الرأى العام العالمى بحيث إن احنا نتساوى مع اسرائيل؛ وبالطريقة دى يضعفوا المكسب اللى احنا بنكسبه النهارده فى الرأى العام الدولى.

استغلوا نقطة ضعف الأردن، والجماعة فى الأردن معذورين الى حد بعيد؛ بلد عايشة لغاية هذه اللحظة بدون أى أمل من الناحية العسكرية، معندهم أمل فى شى من الناحية السياسية. مفيش أمل إذا مشى يارنج، فكل اللى بيهمهم أن يستمر الاتصال مع يارنج بأى تمن وبأى شكل؛ لأن فى تصورهم إذا مشى يارنج الوضع الداخلى بينهار؛ لأن الناس بتفقد الأمل.. معندهم أمل لا فى حل سياسى ولا فى حل عسكرى، ولا شايفين إن فيه مؤتمر قمة بينعقد أهو يونسهم شوية، فالأمريكان ضغطوا على الأردنيين.

سرى للغاية

الخلاصة نجحوا، والأردنيين تعبونا فى اليومين الأخرانيين دول فى إنهم قبلوا الصيغة بتاعة يارنج التى أشرت إليها فى المرة الأخيرة؛ اللى هى تلخص فى القبول للقرار والاجتماع فى مكان، فهم الأردنيين قبلوا بهذه الصيغة واسرائيل رفضت التعديل اللى هو بإضافة كلمه التنفيذ.

فى الأردن لما راح يارنج الموقف لم يتغير اطلاقا، ويمكن الجديد فى الموضوع إنه أثناء ما كان هو موجود، إنه كان ذكر لوزير خارجية الأردن هنا فى القاهرة إنه غير مستعد إنه يخدمنا، وبإنه يقول إن هذه الصيغة أن اسرائيل على استعداد لتنفيذ القرار.

وزير خارجية الأردن بيقول له: ولكن الأمريكان قالوا إن دى معناها إن تنفيذ القرار، قام قال له: طيب روح خذ هذا الكلام من الأمريكان! فطبعا ده كان تحدى من يارنج مكانش مفروض الحقيقة إن الأردنيين يصدقوا بالضبط هذا، فراحوا على أى حال وطلبوا من السفير الأمريكى إنه يتقدم لهم بصيغة بهذا المعنى.

السفير الأمريكى فى بداية الأمر ابتدى يعرض بعض الاقتراحات؛ قبل وقرر فى البداية المبدأ ولكن بيدوا إنه لما اتصل بواشنطن وحسوا إنهم هيخشوا فى فخ، فجه الرد والرد كان الحقيقة فيه نوع من العنف على الأردن؛ إنهم ليس لهم الحق أن يطلبوا من واشنطن أن تعبر عن رأى دولة تالته.. اللى هى اسرائيل! بل حتى ميجبش إنهم يشككوا فى الكلام طالما أنها قبلت كتابه الصيغة اللى قدمها يارنج.

حصل ده نتيجة من الأردن واعتبروا إن ده تحسن للموقف، وطلبوا إدخال تعديلات طفيفة على الصيغة؛ يعنى بدل كلمة قبرص حطوا كلمة الدقيقة نيغوسيا وشالوا كلمة two governments وحطوا representatives. ده التعديل الوحيد اللى أدخلوه وأعطوه ليارنج، يارنج بكره الثلاثاء هيكون فى اسرائيل وبعدين هيجى يوم الاربعاء.

سرى للغاية

الأمريكان نشروا هذا الكلام فى كل أنحاء العالم؛ إن اسرائيل قبلت كتابة وإن يارنج جاى على مصر. الأردنيين قالوا ليارنج: إن إذا قبلت مصر بهذه الصيغة فإحنا هنقبل بها، ونحن مش مستعدين إن احنا نتقابل فى نيويورك إن لم تقبل مصر بهذا.

ولذلك حاول عبد المنعم الرفاعى إنه يجى، وأنا مش رديت عليه الحقيقة وأنا غير مرحب بوجوده وقت ما يجى يارنج. هاييجى يارنج، هو المشكلة الآن لأنه هيجى يارنج وأمام الرأى العام العالمى إنه فيه صيغة موافق عليها مندوب الأمم المتحدة. اسرائيل موافقة عليها، وببيديها لنا فيحاول يحط الكرة فى رجلنا، علينا إن احنا نحاول نرد الرد المناسب ونرجع الكرة تانى ليارنج.

الحقيقة موقف الأمريكان أشرت اليه فى الأول خالص، بعنبره موقف سئ ومستمر فى السوء بالنسبة للرسالة اللى بعنوها للسعودية.

السعودية دى لسه عايزة نوع من التحقيق شوية، هم إدونا صورة وفى آخر الجواب بيتكلوا عن الملك. وطلبت من سفيرنا بيعت لى الرسالة، فقابل السقاف وقال: إن الأمريكان لم يسلموه الرسالة خطيا إنما قالوا له كلام شفوى، الكلام الشفوى اللى إدوه للسقاف واللى نقله السقاف للسفير بتاعنا أخف بكثير جدا من الرسالة.

عبد الناصر: يبقوا كدابين السعوديين، إذا كان الأمريكان إدونا إحنا صورة الرسالة اللى بعنوها لفيصل! (ضحك) بيقى إزاي مدوش الرسالة لفيصل؟ كانوا قالوا لنا شفوى!

سرى للغاية

رياض: أنا بعت له احتياطا وقلت له: إحنا أخذنا الرسالة وبعث له تعليق نقدى للرسالة.. تحليل، بعت له فعلا هذا لكن السقاف وعد وقال: إنه طلبها كتابة وقال إن هتيجى له. محتمل إن يصح السفير السعودى مكار شوية لقي إن اللهجة بتاعتها مش ماشية فى الجو مع السعودية، فبلغها له شفويا علشان مايمسكوش عليه حاجة. فعلى أى حال، السعودية طالبين لأن أنا حسيت من الجواب اللى جه من سفيرنا إن فيه فرق كبير جدا فى الـ .tone

عبد الناصر: طيب ممكن تدينا فكرة عن الرسالة اللى هم سلموها لنا .

رياض: اللى إدو هالنا هنا؟

عبد الناصر: اللى هى الرسالة لفيصل من الأمريكان.

رياض: أيوه.

عبد الناصر: عن الموقف.

رياض: الرسالة عبارة.. الصفحة الأولى بننطها لأنها عبارة عن تأكيد للقرار يعنى تتمسك بالقرار، وبأيضا كنوع من تمسكها بالقرار يتنفذ بترى برضه بعدم شرعية الاستيلاء على الأرض بالقوة، وبمبدأ احترام سيادة الدول وحرمة الأراضى والاستقلال السياسى.. دى الصفحة بحالها بتتكلم عن مبادئ بهذا الشكل.

سرى للغاية

نيجى نخش على طول فى بعد كدا بيتكلم بقى عن موقفه بالنسبة للانسحاب، قال إيه بقى جولدبرج للملك حسين: إن موقفنا بالنسبة للانسحاب، تم مناقشته مع الملك حسين بواسطة سفيرنا فى نوفمبر.. ده بحجة كأنه فيه شئ.

أنا سألت الملك حسين وقتها قالوا لى: هينسحبوا إن شاء الله فيما عدا بعض أماكن معينة بيحصل فيها نوع من ال adjustments.

فأنا قلت له: أنا بهذا الكلام ماقالولوش له أنا بأثير للنقطة دى لأنها نقطة كانت أساسية، فأنا قلت له: هذا الكلام أنا ماسمعتوش من جولدبرج، فقال لى: طيب هو كلم الأمريكان. كان كل ده محاولة من الملك حسين فى الوقت ده أن نقبل بالمشروع الأمريكانى، فبعثوا مخصوص جولدبرج علشان يقابلنى ويدينى التفسير اللى إياه للملك حسين. والتفسير طبعا لم يقنعنى بشئ؛ لأن كل اللى قالوه لى: إن سيناء مفروض إنها جزء من الأراضى المصرية وإن الضفة الغربية جزء من الأردن.. ده تقريبا ملخص كلامه.

وأنا قلت له: إن دى معلومات جغرافية موجودة فى كتب الجغرافيا أن سيناء أرض مصرية وإن الضفة الغربية جزء من الأردن، لكن اللى بنتكلم عليه الانسحاب ولفين بالضبط الانسحاب؛ فماقدرش يدى وقتها دخل معايا فى جدل فى حالة قطاع غزة، فى إن أنتم احتلتيه زى ما اسرائيل احتلت غزة.. فدى النقطة الأولانية غامضة.

هنا نيجى للنقطة المهمة، هم يعنى هنا على طول بيسلموا بإن مقدروش يدوا ضمان بأن كل الاراضى هترجع تانى للأردن، لكن هيبدلوا جهدهم فى الناحية دى. وبعد كدا هنتكلم عن المناطق مش محدها لكن هيحصل فيها adjustment؛ بحيث إن يدوا حته للأردن والأردن تدى حته لاسرائيل.

سرى للغاية

بالنسبة للقدس عبارة عن نص صفحة، المهم إنه مش هيرجعها للأردن وبينتكم عن إدارة دولية. المهم إنه مش راجعة للأردن عاوز يخلق لها كيان دولي، وإن كان ببسلم فقط للأردنيين ببعض مصالح اقتصادية ودينية فى المدينة المقدسة.

وبعدين طبعا فى الآخر، بيدعوا الى التفاوض وإنشاء dialogue بين between the parts إن دى أساسية جدا حتى إن ممكن يارنج ينجح فيها.

دى هى الرسالة اللي المفروض إنه بعته للسعودية.

عبد الناصر: اتكلموا عن سيناء؟

رياض: لا.. ماجبوش سيرة، قطاع غزة يعنى الملحوظة اللي احنا ملاحظينها عليها إنه مجبش سيرة قطاع غزة أبدا. يعنى طبعا إحنا مش بنحاول نعمل جدل بالنسبة لسيناء ولا الجولان باعتبار إن دى حدود دولية مفيش شك، إنما الملحوظة فى هذا إنه ماجبش سيرة قطاع غزة خالص أهملوها تماما. فده موقف الأمريكان وده موقف الأردن، ومنتظرين بكره.. يوم الثلاثاء هيوصل يارنج قدمنا طبعا عدة حلول.

عبد الناصر: قول برضه.

رياض: هو يعنى الشئ المتوقع زى مايقول: إن الموضوع دلوقتى تلاعب ألفاظ بغرض خلق جو فى المجال الجوى يحرمانا من بعض المكاسب اللي وصلنا لها؛ عن طريق إصرار الأمريكان بان اسرائيل قبلت بالقرار نتيجة الصيغة اللي قدمها يارنج.

سرى للغاية

فهو هيعرض علينا الصيغة دي لأول مره النهارده، فايه الرد؟ هو ده اللي بنفكر فيه، إيه اللي ممكن بنرد بيه عليه؟ طبعا لو كانت اسرائيل ناوية تتفد القرار فعلا يبقى مفيش مشكلة سهل أوى أن الواحد يرد عليه، لكن المشكلة إن احنا قانعين إن اسرائيل مش هتفد القرار؛ نتيجة كلام يارنج ونتيجته كل المعلومات اللي عندنا لغاية النهارده. ووضع الانقسام اللي موجود فى اسرائيل بأن عدد من الوزارة مصمم على احتلال كافة الأراضي اللي عليها اسرائيل النهارده. وهذا الموقف لم يتغير وكل واحد يعلم أن هذا الموقف لم يتغير، وإن الحكومة الاسرائيلية حتى هذه اللحظة عند هذا الموقف؛ إن فيه فريق منهم بيقول باحتلال كافة الأراضي، الفريق الآخر مابيقولش كدا ومابيقولش حتى الانسحاب بيكون لفين، إذا الانسحاب يكون لفين مش واضح لغايه النهارده قدام حد.

فإذا هو موقف يارنج جاي، واحنا عارفين إن اسرائيل مش هتفد وأنه سبق وقال لى: إنها مش هتفد. فالسؤال اللي معانا حتى إن الكرة ماتستاش فى رجلينا اللي بنفكر فيه فى الوقت الحالى على ضوء الكلام؛ إن احنا هنطرح عليه السؤال أولا: بنسجل عليه أولا إن احنا فى آخر مقابلة ومقابلات سابقة قال لنا: إن اسرائيل مش هتفد القرار، ولذلك هنوجه له سؤال صريح.. هل هذا الموقف حصل فيه تغير بحيث إن اسرائيل النهارده بلغتة إنها الآن على استعداد إنها تتفد القرار؟

وفى الاتجاه طالما إذا قدم لى ورقة مكتوبة، هقدم له هذ السؤال أيضا مكتوب بحيث آخذ منه رد مكتوب. فإذا كان هيقول إن اسرائيل هتفد فعلا القرار يبقى أنا بقول: إن مفيش مشكلة؛ لأن آخر اجتماع له أنا قلت له: إذا كان اسرائيل هتفد القرار فاتفصل عندك ٣ طرق للتنفيذ، وبرضه بقى فيه طريقة رابعة حتى إنى مستعد اتناقش معه فى التنفيذ فى نفس القاعدة اللي هو قاعد معايا فيها.

سرى للغاية

ده إذا كان قال إن اسرائيل هتتخذ القرار، وإذا قال إن اسرائيل هتتخذ القرار برضه أنا أميل إني لا أقبل منه صيغ؛ لأن هدخل فى لغة وأنا مكتفى بصيغة رسمية واحدة فقط تكفيها اللي هي صيغة القرار نفسه بتاع مجلس الأمن. لكن لما يدخلنى فى صياغة جديدة، وبعدين هنرجع ندخل فى عمليات تفسيرية فى الصيغ دى ونقعد نقرأ فى لغة من جديد ونقول إيه المقصود بيها!

بميل الى إن حتى لو فرض وقال إنه بينفذ، بنقول له اتفضل نفذ لكن بدون مانخش فى صيغ جديدة، وكفاية عندى صيغة غامضة واحدة اللي هي بتاعه مجلس الأمن، ومش محتاج الى صيغ غامضة جديدة وندخل فى محاولات لتفسيرها. هي كلمة واحدة.. طالما إنهم مستعدين ينفذوا مستعدين احنا نبتدى فى إجراءات التنفيذ، يإما هنا وهو يتكلم معايا أو يروح لسفيرنا ويتكلم معاه فى نيويورك، إذا كان عاوز أو يقبل بالاقترحات الأخرى اللي سبق وقلناها له عن طريق مجلس الأمن أو عن طريقه هو يتقدم باقتراحات.

ده لو فرض وقالوا إنهم فعلا هينفذوا، وأنا أشك طبعا إنه هيقول هذا، فإذا كان هيقول إنه مش هينفذوا فالحل بسيط جدا والمشكلة بسيطة؛ بيان أنا هطالبه بأنه يدينى الرد مكتوب.. أقدم له سؤال معين محطوط بطريقة معينة بحيث إني ألزمه إنه يدينى الرد أيضا مكتوب يعنى. وبالطريقة دى برجع الكوره تانى للأمريكان ولإسرائيل لأنه فى هذه الحالة هيقول لى: إن اسرائيل على موقفها إنها مش هتتخذ القرار؛ لأن هيتحط السؤال بالطريقة اللي يخليه يرغم على إنه يدينى نفس الرد السابق، هيبقى بهذه الطريقة إن الكرة رجعت لهم تانى وإن اسرائيل مش بتتخذ القرار، وأنا מבحطش صيغ علشان مش يتاخذ علينا رفض أو قبول.

دى الخلاصة.

سرى للغاية

عبد الناصر: فيه حاجة يادكتور فوزى؟

د. فوزى: يافندم طبعا ده مدلول على إنه أسلوب جائق وأكثر من جائق، من هنا لغاية يوم الأربعاء بعض الظهر أظن يبقى جه الوقت إننا نتشاور فى الموقف فى اللى هيحصل أما ما يحصلشى فى أثناء مقابلة يارنج. ربما سيادتك تذكر إن مرة قريبة أشرت الى إنه هيكون من النقط الأساسية اللى لازم نواجهها هى بحث - حتى لما تكون اسرائيل بتقول هاقبل تنفيذ القرار - لابد أن نبحت فى نقطة.. ماذا تعنيه قبل القرار فى فهمها للقرار؟ وإلا يبقى معملاش حاجة! يعنى هتقول لنا هانفذ القرار لكن أنا هانفذ القرار ده بالشكل الفلانى، فإذا لابد إننا فى وقت قريب نحاول أن توجه الأضواء وتركز فى نقطة تحديد معنى القرار. وأظن ده لسه مجاش وقته وهييجى قريب بعد المقابلة بتاعة الأخ محمود فى هذا، إذا أذنت لى سيادتك أكتفى بهذا.

عبد الناصر: فيه حاجة تانى بالنسبة للكلام اللى قاله رياض؟ أيوه.

صوت: يعنى برضه من الحاجات اللى الواحد بيتساءل عليها.. هل حقيقة إغلاق القنال بيؤرق أمريكا ولأ هى فيها نوع من يمكن للحيلولة بين الأسطول الروسى وبين النفاذ له فى المحيط الهندى؟ يعنى مش عارف.

عبد الناصر: لأ.. هو عملية الأسطول الروسى والهند، هو الأسطول الروسى يعنى الهدف ليه النهارده إنه يتواجد فى البحر الأبيض وأصبح حقيقة واقعة. ولكن هو النهارده قفل القنال معمول للضغط علينا، يعنى هو القنال يمكن

سرى للغاية

كان سلاح فى إيدينا ودلوقتى بقى سلاح ضدنا يعنى ده رأى فى الموضوع، ولا زال موضوع الضغط علينا اقتصاديا موجود.

سليمان: موضوع واحد هنعرضه اللي هو نوقش النهارده فى القوى العاملة، علاوة خاصة بخريجى الجامعات. مجموع الخريجين من الجامعات والمعاهد العليا دفعتى يوليو ونوفمبر ٦٧: ٢٤,٨٣٦، من تم تعيينهم حتى الآن سواء فى شركات أو القطاع العام أو عن طريق التكليف أو عينوا فى وزارة التربية والتعليم ١٠,٤٩٢، الطلبات اللي قدمت الى وزارة العمل ١٢,٧٩٤، دول هم اللي هيتم تعيينهم سواء على درجات شاغرة فى الوزارات أو هيتم بعد كده توفير اعتماد مالى لهم.

عبد الناصر: دول ١٣,٠٠٠ دول يعنى؟

سليمان: ١٢,٧٩٤، اللجنة كان ليها بعض الملاحظات على العرض والطلب، لاحظت إن فيه مغالاة شديدة من بعض الوزارات فى طلباتها من الخريجين، طالما إن هيتم تدبير اعتماد مالى عن طريق الميزانية. ولو إن اللجنة رحبت بهذه المغالاة لأنه مقرر تعيين جميع الخريجين، ولأن العملية بتسهل مهمة اللجنة، إلا أن من ناحية ثانية بيتعذر تحديد الاحتياجات الحقيقية، وبالتالي رسم سياسة لإيجاد توازن بين الطلب الحقيقى وسياسة القبول فى الكليات والمعاهد العليا.

لهذا السبب طلبت اللجنة من الجهاز المركزى للتنظيم والإدارة، تقدير الاحتياجات الفعلية للوزارات من التخصصات المطلوبة لتكون كمؤشر يوجه سياسة القبول فى الجامعة. السياسة اللي اتبعت فى العامين الماضيين بشأن القبول فى الجامعة، عالجت جانب من المشكلة وهى

سرى للغاية

موازنة القبول فى الكليات بالذات القبول فى كلية أو خفضها فى كلية أخرى، ومتعرضتش للتخصصات أو للشعب اللي موجودة فى الكليات. ترى اللجنة بالتعاون مع وزارة التعليم العالى، توجيه التخصص فى الشعب المختلفة فى الكليات هذا العام، بحيث إنه يتلاءم مع الطلب الفعلى؛ لأن اتضح لها إن فيه عجز شديد فى خريجي بعض الشعب فى الكلية الواحدة، وزيادة لها ملهاش ما بيررها فى شعب أخرى فى نفس الكلية؛ مثلا كلية الآداب العجز الظاهر من خريجي اللغات الإنجليزية والفرنساوى والمكتبات حوالى ٩٠٠، الفائض فى خريجي اللغة العربية والتاريخ والجغرافيا والصحافة وعلم النفس والاجتماع ١٠٠٠.

عبد الناصر: اقلوا قسم الجغرافيا! (ضحك)

سليمان: ممكن قوى إننا نعمل هذا التوازن، ولو إن ده مش هياثر إلا بعد ٣ أو ٤ سنين. بنجد أن بالرغم من أن المجموع الكلى لطلبات الوزارات بلغت ١٨,٠٠٠، فى حين إن الطلبات اللي تستحق الترشيح ماتزيدش عن ١٣,٠٠٠؛ يعنى فيه طلب كلى يزيد عن المعروف بحوالى ٥,٠٠٠ خريج، بنجد أن التخصصات الفائضة عن احتياجات الوزارات ٣,٥٠٠.

عبد الناصر: يعنى دلوقتى الوزارات طالبة أكثر من الموجود؟!

سليمان: آه.. طالبة يعنى بكل راحة، يعنى فيه وزارات طالبة ٤,٠٠٠.

عبد الناصر: مين طالب ٤,٠٠٠ يعنى؟

سرى للغاية

- سليمان: وزارة الزراعة والإصلاح الزراعى، وفيه وزارات ثانية طالبة يعنى الخزانة طالبة ١٥٠٠ الزراعة والإصلاح الزراعى ٣٥٠٠.
عبد الناصر: طيب ما كويس.
- سليمان: العدل ٦٠٠، العمل والتأمينات الاجتماعية ٧٠٠، يعنى طلبات.
عبد الناصر: نعم.
- حجازى: الواضح يافندم مفيش دراسة.
عبد الناصر: مفيش إيه؟
- حجازى: مفيش دراسة على مستوى الوزارات.
عبد الناصر: طيب أمال الأرقام دى جت؟
- حجازى: لأن فى المناقشات دلوقتى بعض الوزارات بيقولوا اتفضل خد فائض عايزين يغيروا تخصصات معينة.
- سليمان: هو اللي بيحصل يعنى مثلا برضه فيه ملاحظة يعنى طريفة، اللي بيحصل إن بعض الوزارات بيقولوا: طيب إذا مخدناش دول هتوديهم فين؟ فهم يعنى بيساعدونا على حل المشكلة، يعنى وزارة الأوقاف مثلا بتشوف خريجي الأزهر كلهم وتطلبهم.

سرى للغاية

عبد الناصر: طيب كتر خيرهم يعنى. (ضحك)

سليمان: ويرجع الأزهر يطلب نفس الخريجين! فإذا النتيجة إن فيه عجز لخريج الأزهر حوالى ٨٠٠ لأن الوزارة دى طلبتهم والوزارة دى طلبتهم، ناقشت اللجنة لهذا السبب، هل نفرض على الوزارات تخصصات لا ترغب فيها وقد يكون فيه ضرر؟ أو نسيب للوزارات الكلمة الأخيرة مع احتمال إبقاء بعض الخريجين بدون تعيين؟ أخيرا اتفقنا على حل وسط، اللي هو إن السيد وزير العمل يدعو مندوبين من جميع الوزارات لدراسة أفضل الوسائل للاستفادة من التخصصات الفائضة فى أقرب مجالات عمل لها، وبعدين اعتبرت اللجنة تبدأ من اليوم تعيين فى الخريجين من النهارده ١٥ إبريل لدفعة يونيو ومن ١٥ مايو لدفعتى نوفمبر ويناير، أرجو الموافقة.

عبد الناصر: إيه دفعة نوفمبر ويناير دول.

سليمان: دول بقى اللي تخلفوا عن دفعة يونيو، بيמתحنوا فى نوفمبر فى بعض الكليات ويناير فى بعض الكليات.

عبد الناصر: نعم؟

سليمان: الدور التانى يعنى.

عبد الناصر: دور تانى.

شقير: الطلبة المتخلفين اللي فى السنة الأخيرة مادتين.

سرى للغاية

عبد الناصر: أنا فاهم إن مفيش دور تانى يعنى.

شقىر: لأ.. بكالوريوس، فى السنة النهائية.

سليمان: ده خلاصة الموضوع، طبعا هنقدم للمجلس دراسة بعد شهر أو شهر ونص، بنعرض فيها صورة ثانية عن الاحتياجات الحقيقية للخريجين وهناقشها مع وزارة التعليم العالى. إذا وافقت سيادتكم نعلنه قرار من بدء التعيين هيبتدى من بكره.

عبد الناصر: آه.. من النهارده بقى النهارده ١٥.

سليمان: النهارده ١٥، لأ يعنى بالأقدمية مثلا بنحطهم كلهم فى أقدمية واحدة.

عبد الناصر: اتفق مع خيرى على القرار.

سليمان: حاضر.

عبد الناصر: فيه أى حد أولاً ليه تعليق ولأ حاجة بالنسبة للتعين يعنى؟ أنا كان عندى القرار بتاع إلغاء النصوص المانعة من حق التقاضى، وأنا رأيت إن احنا منعلنوش قبل ٣ مايو، فيبروح اللجنة التشريعية.

الشافعى: جت لنا مذكرة مبدئية.

سرى للغاية

عبد الناصر: هو فى المذكرة فيه حاجة إنه أسئ إستخدامه وبتاع، مفيش داعى يعنى أن ندمغ الناس بإساءة الاستخدام. بالنسبة للمذكرة التفسيرية، بالنسبة للكلام اللى اتقال فى البيان، اللى هم الناس اللى عايزين نمشيهم من مواقع الإنتاج أو رؤساء المدن أو إيه تانى؟

صوت: أو المحافظين.

عبد الناصر: أو المحافظين أو السلك السياسى، لازم تكونوا جاهزين على أول مايو بالنسبة لهذا الموضوع. وإذا كان حد عنده فى الوزارات بالنسبة للحاجات الكبيرة إن زى أخينا بتاع الشئون الاجتماعية، ممكن أظن إن بعد ٣ مايو نكون جاهزين على طول، على أساس الحقيقة بالنسبة لمواقع الإنتاج ماحناش عايزين شلل يتشال ده وبيجى ده لأن ده بتاع فلان وده بتاع علان؛ يتشال ويجى اللى بعده على طول. دى العملية اللى أنا اتكلمت فيها قبل كده ونمشى العملية بهذا الشكل، إذا كان فيه حالة خاصة واللى بعده ما ينفعش وكدا يبقى موضوع يحصل معايا كلام فيه شخصيا، ونشوف هذا الموضوع.

العناصر السيئة معروفة، وممكن إذا كان حد عايز يعرف العناصر السيئة شعراوى بيقرر يقول العناصر السيئة - أمين وشعراوى - يقدر يتصل بيه ويجيب لكم العناصر السيئة الموجودة، وأنا عارف العناصر السيئة الموجودة فى كل حنة، ولكن تكون الحاجات ديه جاهزة على آخر الشهر. بالنسبة للمذكرة الثانية الخاصة بتاعة التنظيم والتدريب، بنأجلها لجلسة أخرى.

ف. فوزى: هى بس بالنسبة للتعيين اللى كان سيادتك.

سرى للغاية

عبد الناصر: نعم؟

ف. فوزى: بالنسبة للتعين، خريجى الثانوية الفنية والصناعية اللى متعينوش من سنة ٦٤.

عبد الناصر: أنا كنت أتكلمت على دول خريجى المدارس الثانوية الفنية.

سليمان: عينا دلوقتى ٦٦ هنبتدى فى ٦٧.

عبد الناصر: إتعين يعنى؟

سليمان: ٦٦ آه.

ف. فوزى: ٦٤ يافندم.

سليمان: ٦٤ و ٦٥ دول اتعينوا من زمان، دول مهماش مشكلة هي ٦٦ و ٦٧ هم اللى كانوا متخلفين.

عبد الناصر: وفيه ناس فى الجيش من اللى دخلوا أنا شوفت واحد.

ف. فوزى: ٦٤ يافندم.

عبد الناصر: آه.. قال لى إنه خريج ٦٤ وماشتغلش.

سرى للغاية

سليمان: مقدمش، بيقى مقدمش لوزارة العمل وفقد حقه، يعنى فيه بعضهم.

عبد الناصر: الناس اللى دخلوا الجيش من المدارس الفنية، بنعمل قرار بتعيينهم بس ميخدوش فلوس إلا بعد ما يسيبوا الجيش، يعنى بحيث أحتفظ له بأقدمية إنه واقف. يعنى أنا شوفت الولاد دول هناك، فيه واحد شوفت مثلا موقع سألت.. ده إنت خريج إيه؟ خريج مدرسة ثانوية وبيأخذ ماهية. والتانى، إنت منين؟ قال لى: إنه من الفلاحين، طيب خريج إيه؟ قال لى: سنة ٦٤، طيب مااشتغلتش ليه؟ قال لى: حاولت أشتغل مااشتغلتش. فأنا الحقيقة باينين واحد بياخذ ماهية عالية والتانى مايبأخذش، فالحل الوسط إن احنا بنعينه وبنديله أقدمية ولكن ما ندلوش الماهية إلا بعد ما يسيب الجيش.. أعتقد أن ده حل سليم.

سليمان: ده قليل جدا من دفعة ٦٤ و ٦٣.

عبد الناصر: قليل.. بيقى مش مشكل.

سليمان: وده يعنى لابد من إن هو كان بيشتغل فى عمل وقتئذ ورفض إن هو يتقدم أو اشتغل فى حنة واترتفت.

ف. فوزى: يمكن لكن هى مكسبها إن العنصر ده هو أحسن العناصر بالنسبة للقوات المسلحة، وهم أكثر الناس تخلفا.

سرى للغاية

عبد الناصر: هم الحقيقة أنا فى رأى إن العنصر ده كجنود أحسن من خريجي الجامعات؛ لأن خريجي الجامعات خالقين مشكلة دلوقتى. أنا فى تصورى فى القوات المسلحة عندكم منهم كام ١٥٠٠ ولآ؟

ف. فوزى: والله مابانش حاجة، الناحية الاقتصادية وحشة بالنسبة لى لأن مدة الخدمة سنة بينما الثانى.

عبد الناصر: آه.. لو نعتمد على خريجي المدارس ديه أكثر من..

ف. فوزى: الصناعية أفضل العناصر.

سليمان: لأن دول قطعاً عندهم مهارة ميكانيكية أحسن، وبعدين يعنى فيه نقطة برضه برجوا أن نشير إليها؛ لو ناخذ الخريجين مباشرة نديهم أفضلية على الناس اللى هم أجلوا لغاية سن ٢٨ وكون عيلة وأسرة، يبقى أحسن. يعنى لو ناخذ مثلاً من الدفعات اللى بتخرج توا اللى بيخرجوا دول ناخذهم على طول، ناخذ شوية من الجامعة وناخذ شوية من المدارس الثانوية الفنية؛ يبقى ده ملوش مشاكل زى الثانى اللى قعد لغاية سن ٢٨.

مراد: لو أذنت لى سيادتكم.. فى موضوع التعيينات فيه مشكلة تانية يمكن عرضت قبل كده فى مجلس الوزراء خاصة بخريجي دور المعلمين والمعلمات، كانوا قبلوا أعداد كبيرة على أساس الخطة الخمسية اللى فى سنة ٦٩/٧٠ هيكون التعليم الابتدائى بيغطى ١٠٠٪ من الأولاد فى سن الإلزام، لما عدلت الخطة الخمسية مرة أخرى جعلوا النسبة تبقى ٧٠٪ بدل ١٠٠٪ فى سنة ٦٩/٧٠ فأصبح فيه فائض فى المدرسين عن حاجة المدارس للتعليم

سرى للغاية

الابتدائي؛ فالسنة دى تخرج ٩٠٠٠ إتعين ٣٠٠٠ فى الدرجات اللى الموجودة فى وزارة التربية والتعليم، وفيه فائض ٦٠٠٠. السنة اللى فاتت صدر قرار بتعيين الفائض كان ٤٥٠٠، إتعينوا كلهم عن طريق اللجنة الوزارية للقوى العاملة. السنة دى دول عاملين برضه روشة فى كل الأقاليم، وأنا شوفتهم لما روحت الفيوم وشوفت إمبراح اتحاد طلاب التعليم الثانوى. فالمشكلة برضه محتاجة لعلاج لأن دول مش هيقدرُوا يشتغلُوا فى أى حتة، لأن دول متخرجين كمعلمين فمالهمش مجال إلا فى التربية والتعليم. فالمشكلة لو أذنت سيادتك نبقى نعرضها فى لجنة القوى العاملة والنظام وننظرها.

عبد الناصر: أى موضوعات أخرى؟